

S A L E H A L - H A M D A N I

# حكايتي

4.11.2017 (34)

## مع أم حسام



صالح الحمداني

يوميات زوج

دار الحكمة  
لنجد

# حكايتي مع أم حسام

Telegram: Somrlibrary



صالح الحمداني

# حكايتي

مع أم حسام

دار الحكمة  
لنجد



- حكايتي مع أم حسام
- تأليف : صالح الحمداني
- الطبعة : الأولى ١٤٣٧هـ / ٢٠١٦م
- الناشر : دار الحكمة - لندن
- لوحتا الغلاف : للفنانة العراقية ناديا أوسي

**ISBN: 978-1-78481-071-9**

© حقوق الطبع محفوظة

**DAR ALHIKMA**  
**Publishing and Distribution**



88 Chalton Street, London NW1 1HJ Tel: 44 (0) 20 7383 4037 Fax: 44 (0) 20 7383 0116

E-Mail: hikma\_uk@yahoo.co.uk Website: www.hikma.co.uk

Telegram: Somrlibrary

## الاهداء

الى كل زوجة تدلل زوجها..



## التقديم

عن صالح الحمداني وأم حسام

هذا كاتب لا تنسى رففته في الحياة والكتابة. عرفته على حين غرة وسرعان ما بات صاحبي. التقيته في شارع المتنبي ذات يوم فتعارفنا وتضاحكنا وأتذكر أنني حدست فوراً أن فيه شيئاً مختلفاً عن الآخرين. لا أعني سحرته التي لا تفارقه فقط، بل تلك النظرة النافذة للأشياء وطريقة طرحه لأفكاره التي تنساب كالماء الزلال. منذ ذلك اللقاء، ظلت ضحكته تلعلع في ذاكرتي وروحي ومعها تنتثر رائحة روح ذكية وعطرة في الوقت نفسه.

قبل ذلك، كنت قد قرأت لصالح الحمداني مقالات في بعض الصحف، لكنها كانت من نوع المقالات الجادة التي لا تناسبه. لعله لم يكن حينها قد تلمس بصمته في الكتابة بعد، وهي البصمة التي أحسب أن لا يمكن لأحد تقليدها إلا سقط في وهم عظيم. ذلك أن البصمة الفردية، مع كتاب من أمثاله، تشبه اصطناع مفتاح لغرفة سرية لا يعرف رمزه سواه. وإنه لمن العبث محاولة استنساخ هذا المفتاح. أقول هذا لأنّوه أنه سرعان ما وجد بصمته وكانت واضحة في الأعوام التي تلت معرفتي به، إذ نشط بشكل محموم بحيث انتبه له قراء من كل الشرائح وأبدوا إعجابهم بما يكتب، سواء في مقالاته التي ينشرها في الصحف، أم في صفحته



الفيشوكية التي كان يزداد عدد متابعيها يوما بعد يوم.

ولكن ما ميزة الحمداني التي جعلته مقروئا ومحبوبا هكذا؟ إنها السخرية السوداء والأفكار الطريفة الممزوجة بما نسميه "الحسجة"، هذا الفن اللغوي المحلي الذي بقدر ما يبدو سهلا يسيرا إلا إنه يتطلب عدة خاصة لا تتوفر إلا للقلائل. ومن ذلك الحكايات التراثية والأمثال والكنيات والبلاغات ذات الطابع الريفى. فضلا عن ذلك، يحتاج الأمر لخيال جامح يتطلبه الربط بين الظواهر والبحث عن مصاديق لها. توفر الحمداني على كل ذلك عدا الموهبة اللافتة في السرد التي لو جربها في كتابة الروايات لأصاب حظا عظيما من النجاح. قلت له ذلك ذات يوم لكنه ما التففت لنصيحتي ولم يأخذها على محمل الجد.

قدر تعلق الأمر بهذا الكتاب الجميل، الكتاب الذي قرأته مفرقا ومجموعا، فإن جميع خصائص الكتابة الساخرة تتجسد فيه ومعها يتجسد حس سردي قلما تلتقيه عند غيره. أمّا أم حسام فامرأة من بنات أفكاره، مرسومة ببراعة بحيث أن القارئ، بمجرد الغوص معها، سيتخيلها ويكاد يتلمس غضونها ولهجتها وترافتها. إنها رمز المرأة المشتهاة المغناج التي يحلم بها كثير من الرجال خصوصا ممن يتجاوزون الأربعين ويبدأ قوس بهجاتهم بالانحدار نزولا. هنا تأتي رمزية أم حسام لترد العافية لهم لاسيما إذا كانوا من ذوي القلوب الخضراء والأرواح الطرية كصاحبنا.

وبعد، فإن الحكايات عبارة عن مرادوات حسيّة ووصف للذادة العشق روحيا ومحاولة الوصول له بشق الأنفس والتغلب على المنغصات التي تعترضه دائما. ذلك أن معشوقتنا أم حسام لا تأتي دونما منغصات تحيط بها وتثبط خطاها. ولدى صالح الحمداني وصفة جد طريفة لهذه المنغصات سيصادفها القارئ فيغرق بالضحك. نعني زوجة البطل العاشق وبينه

الملاعين الذين ينطون في القصص بين لحظة وأخرى فيؤخرون أحلام العاشق الرومانسي ويحولونها لكوايس. فالرجل ذو عائلة ولديه روابط تجرجه من ياقته للبقاء في الأسر، لكنه يرفض، ويصر على التمتع بحلمه الموشى بالساتان الأخضر، الطري المعروض بلوحات رائقة لأم حسام ذات اللهجة العجيبة.

لمن يتوجه هذا النص أو النصوص المكتوبة كحكايات تشكل ما يشبه الرواية القصيرة الساخرة؟ سؤال يجيب عنه أنماط القراء الذين يتابعون ويقرأون لصالح الحمداني. فصاحبنا يتجه للناس جميعا في كتابته، مثقفهم وغير مثقفهم، أبناء الطبقة الوسطى وما دون الوسطى، النساء والرجال، الشبان والصبايا. لهذا يكتب الحمداني النصوص بلغة تتوسط الفصحى والعامية وإن غلب العامي على نصوص هذا الكتاب. وإذ أقول أنه يلتمس ذلك في اللغة، فلأنه يركن إلى توشية النص بالكناية الطريفة والمثل الشائع والحوار المغرق أحيانا في الشعبية لدرجة يخيل إليك أنه يسرد قصة مررنا بها جميعا.

تذكرني هذه الطريقة، في الواقع، بأساطين المقالة الساخرة الذين عرفتهم الصحافة العراقية منذ العشرينيات وعلى رأسهم ميخائيل تيسي، صاحب جريدة "كناس الشوارع" ونوري ثابت (حزبوز)، صاحب جريدة "حزبوز" الشهيرة. فهذان الكاتبان كانا أثارا الانتباه مبكرا للغة الشعبية التي تتوسط العامية والفصحى ونجحا نجاحا كبيرا في تكوين قاعدة قراء عريضة لهم. لدى الحمداني همٌّ مشابه، وأتصور أنه نجح فيه نجاحا جيدا بدليل اتساع قاعدة قرائه خلال السنوات الماضية.

نعم، صديقي كاتبٌ ناجح ولديه قراء يحبونه ويتابعونه ويتفاعلون مع شخصياته التي أغلبها شعبية وتتميز بالذكاء والتوفر على موهبة

”الحسجة“. هل للسياسة حضورٌ لديه؟ نعم، السياسة حاضرة في أغلبِ مقالاته لكنها تغيب في هذا الكتاب مقابل حضور السخرية الكثيف. كتابٌ رائع وعظيم الطرافة هو فهنينًا لنا به.

محمد غازي الأخرس

نيسان ٢٠١٥

## المقدمة

لم أكن أتصور يوماً أن ما بدأ كنوع من الكتابة الترفيهية التهامية "التحشيشية"، في صفحتي على موقع فيسبوك سيلاقي كل هذا الاهتمام من الأصدقاء والمتابعين، ويتحول الى مجموعة مفتوحة يتزايد عدد زائريها يوماً بعد يوم، بفعل سلسلة مغامراتي الافتراضية، مع بطلتها السيدة المحترمة الجميلة المغناج: أم حسام، وها هي اليوم تتحول إلى كتاب أمل أن يكون بمثابة حبات سكر تحلي لحظاتكم بعيداً عن مرارة العنف التي تعكر صفو حياتنا.

الكتاب هذا يجمع ويوثق سلسلة مدونات لمغامراتي مع زوجتي الثانية الافتراضية بالطبع والتي سبق أن نشرتها، على مدار أكثر من عامين، على موقع التواصل الاجتماعي فيسبوك والتي تدور في فلك البحث عن إجابة لتساؤل لطالما أرقني، كما أرق معظم المهتمين بالشؤون الكاشانية: لماذا لا تشيخ بعض النساء؟ ولماذا تتوقف عقارب الزمن لديهن عند حاجز الأربعين عاماً وشهر واحد فقط لا غير؟! وكيف لبعضهن هذه القدرة على الاستحواذ على فؤاد الرجل وكسر رتابة الايام؟

لست خبيراً في السجاد الكاشاني، ولا أدعي بأنني كازانوفازماني كي أملك الإجابة الصحيحة عن هذا السؤال، لكنني رجل شرقي، شأن باقي الرجال في هذا الشرق يحلم ويبحث عن نصفه الآخر في وجوه كل النساء

اللاتي يصادفهن، بحث عن وصفة سحرية لو شئت لامرأة استثنائية تكون هي: الأم، والصديقة، والحبيبة، والعشيقة، والسند.

فالرجل العربي، والعراقي على وجه الخصوص، مهما نضج يظل في داخله طفلاً، متعطشاً لامرأة تجمع كل النساء.

قليلون أولئك الذين يعثرون على ضالتهم، وإن حصل، تجدهم شديدي التمسك بها، تمسك الطفل ب (أذيان) عباءة أمه، وكتلعي بأطراف فستان أم حسام المشمسي اللون، والزبرجدي الملمس.

قد يقول البعض إن مثل هذه المرأة نادرة الوجود، لكني أكاد أجزم أن في داخل كل امرأة هنالك أم حسام مخبأة، يمكنها أن تخرج متى ما قررت هي فك أسرها، وإطلاق العنان لها!

يتساءل الكثيرون إن كانت السيدة أم حسام شخصية حقيقية، أم أنها من محض الخيال، ويتصورون أنني أتهرب من الإجابة حين أقول: إنها من وحي الإثنين في آن معاً! فالقاريء لهذه المغامرات التي جاءت بلهجة جنوبية في الغالب وإن لونها أحياناً البغدادية والمصرية في بعضها خزير من المشاهدات والروايات التي جمعتها الذاكرة، وتلك التي خبرتها بنفسي، سواء في سنوات نشأتي في مدينة سوق الشيوخ أو خلال سنوات دراستي ثم عملي في العاصمة بغداد أو تلك التي جاءت من وحي أفلام سينما أيام زمان.

خلاصة القول إن أم حسام هي صدى لحكايات أهلنا والتراث، هي امرأة لرغبات الرجال وتوق النساء.

صالح الحمداني

نيسان ٢٠١٥

## مدخل لماذا أم حسام؟

تشعرك امرأة بحجم وشكل وجمال ورقة وذوق أم حسام بأنك: جورج كلوني، وبأن خصلات شعرك البيض والصلعة الصغيرة التي بدأت تزحف رويدا رويدا لتزيد جبهتك إتساعا وتتطابق مع تسمية خصومك لك «بأبي گصة»، تجعلانك.. أكثر رجولة وإثارة..

وبأن قميصك السمائي أبو الأربع تالاف دينار، هو بلا شك من ماركة «بيير كاردان» وأن لونه لازوردي فاتح، وأن أزراره من الصدف المطعم بالكهرب «أبو الحشرة»..

وبأن عطرك الذي لا إسم له، لا بد أنه «گريد» أن لم يكن «سوفاج دي كريستيان ديور»، وأنه يملؤ الدنيا شذى، إذا ماكنت متواجدا في أي بقعة من هذه الارض الواسعة.

تشعرك أم حسام بأنك رجل مهم، مختلف ومميز.. وطاير بالجوا!  
هذه السيدة لفرط أنوثتها، ولأن الله يحبها - كما تصرح دوما - فإنه منحها سبحانه نعمة الخنّة، والخنّة مصدر خنّ، وخنّ يخنّ خننًا وخنينًا وخنّة، فهو أحنّ وهي خنّاء والجمع خنّ، وخنّ الشخص: خرج صوت بكائه أو ضحكه أو كلامه من أنفه. وقيل ”إنك تخنّ خنين الجارية” وقيل

أيضاً ” إنه كان يسمع خَينُهُ في الصلاة ” ، والخُنَّةُ ضربٌ من الغنَّةِ، كأن  
الكلام يرجع إلى الخياشيم!  
وما خنت أم حسام يوماً وهي غاضبة - على ندرة غضبها - لكنها متى  
ما كان متاحاً لها أن تتغنج: خنت!

# 1

## من هي أم حسام؟

جارتنا (الفص غلاص)<sup>(1)</sup> أم حسام، التي لا زالت في العشرين من العمر منذ عشرين سنة، بقيت متمسكة بالعادة العراقية اللطيفة، ألا وهي تبادل الطعام بين البيوت..

عمت عيني كلما تسويلها أكلة حلوة، لو حلاوة، تجي بكل عظمتها - والعظمه لله - وتدگ الباب بكل ما تحمله أميرة حقيقة من رقة وعذوبة، وتجب أنة صحنين: «واحد للبيت، وواحد (لأخوية) أبو نايف!»  
اليوم دگت الباب برقتها المعهودة:  
طگ.. ططگ..

عرفت هي اللي بالباب، ردت أطلع بس محد يخليني أفتحها الباب، كلهم يعرفون دگتها، وبس تدگ الباب ركضت عباد الله كلها، تگول  
الريس جاي!

طبعاً من مميزات أم حسام، أنها دوما تعطيك إحساساً بأنها للتو قد

---

(1) فص غلاص: تحوير دارج في اللهجة العراقية لكلمة فيرست كلاس الانجليزية



خرجت من الحمام، يعني ريحة الصابون والشامبو، وصلتني عبر جهاز التبريد في غرفة الضيوف، وطبعاً أنا فارش السجادة، وسبحتي بيدي، وجاي أتهدد بالصحيفة السجادية، وحسيت ذاهت روحي!  
مدري من الخشوع - يا مسلمين - مدري من ريحة أم حسام، مدري من گالت:

«وهذا لابو نايف ووصيه يقرأ الفاتحة لروح أبو حسام»..  
أنه يمكن راح أقرأ (جزء عم) كله على روح أبو حسام، الله يرحمه ويغمد روحه الجنة..

ردت (اگمز) للمطبخ أشوف شجاية أم حسام، بس خفت لا أحصلي حجاية! ظليت أقرأ قرآن وأبجي!

صار فترة أفكر أتزوج أم حسام، الصراحة حلوة، العمر إتناصف وما ظل أنة شي بعد غير رحمة الله وحرامات هالجمال العراقي الاصيل يذبل گدام عيني، وآنه (أتنوع) وأبجي.

زواج أم حسام ما يكلفني شي، هي عدها بيت ملك، وراتب يكفيها وزايد، وعدها حسام طالعتله بعته لبريطانيا، وشهر شهرين وفالت.  
والحايط بصف الحايط والباب بصف الباب، وليه هنا، وليه هناك، وأصيرن:

«يا مسعدة وبيتج على الشط، ومنين ما ملتي غرفتي ..»  
وين أبا عبد الله!

## ماعون هريسة

عصراً، والشمس تودع الارض بعد أن ألهبتها بسياطها النارية ذات الـ(٤٥) درجة سيليزية، شعرت برائحة شامبو (هيد أند شولدرز) ذو اللون الازرق تتسلل الى غرفة الاستقبال، التي جلست كعادتي أقرأ فيها القرآن وبعضاً من دعاء كميل..

ثم ما لبثت أن دخلت علي رائحة أخرى، أظن أنها رائحة صابون (دوف) الفاخر، بعدها بثواني غمرتني رائحة ورد الباشتولي الرائعة.. حسبت أول الامر أن أحد الاولاد يستحم في الهواء الطلق قرب مبردة البرفاب (الساخت إيران)<sup>(١)</sup> لكن صوتها الساحر بدد الظنون كلها، فالسيدة أم حسام في بيتنا: يا مرحباً يا مرحباً.

- فدوة هذا ثواب الكم حبيبي إنتِ، وهذا الماعون البايكس بيه هريسة مسويتها على لحم رگبه مال طلي هرفي<sup>(٢)</sup>، وعليه دارسين وشكر مطحون وخيط دهن حر، لأخوية أبو نايف، ياكلها بالعافية من يفطر، وبوراها يحلي بهاي الخوخاية المخمخة<sup>(٣)</sup>، ويقرا

(1) ساخت ايران: صنع في ايران بالفارسية

(2) طلي هرفي: خروف صغير العمر

(3) مخمخمه: ناضجة جدا

الفاتحة على روح المرحوم.

[وعلي، راح أقراله سورة البقرة وآل عمران طبك...]

- ممنونين أم حسام خية، وألف رحمة على روحه دادة

- ووالديج الجنة، بس ردت أبو نايف [أويلي]، يجي وياي للبيت

[أويلي.. يابه]

جاوبتها (جماعتنا) بغضب وربما بلؤم أيضا: وشيسوي عندج

بالبيت!؟

- دادة عندي الجينج أوفر<sup>(1)</sup> بيه جدحة زغيره من تجي الكهرباء

الوطنية، وأريده يشوفلياه، شنو بيه رخاوه [أخرب ع الرخاوة]

ويضبها للرخاوة، لو أبدله للتالي!

- أم حسام، هو أبو نايف شفهمه بالكهرباء.. [شوف حظي]،

جينيلج فد واحد كهربائي أحسن ما يلعلج الباشمهندس أبو نايف

بالكهرباء ويسولج قدر لا سمح الله! [شوف هاي]

طبعا أنا أسمع السوالف واتبرغث بالاستقبال، أريد بس يصيحوني

حتى أضب البراغي مال الجينج أوفر، بس رحمه ماكو!

- زين صيحيلي أبو نايف، بلكي بلا زحمة، يجييلي كهربائي [خطره

أم حسام، كولش خطرة]

- نايم سوده عليه، وما يگعد إلا قبل الفطور بسبع دقائق، [يمة يمة]،

وأذا گعدته

هسه يصير أعصاب داده ويبسط البيت كله [أي مو عدنان القيسي<sup>(2)</sup>!]

---

(1) Change over جهاز يدوي لتبديل الكهرباء:

(2) عدنان القيسي: بطل المصارعة الحرة الشهير في السبعينات

أم حسام بكل أريحية وهدوء: نسلم عليكم دادة، وسلميلنة عود!  
وبدون أريحية ولا هدوء: دادة، شرفتينة، الله يسلمج..

طبعا أنه سويت حجتي خاشع بدعاء كميل وشبعت بواچي، على  
الفرص اللي جاي تهدر بحياتنا، بسبب ناس يقفون حجر عشره أمام  
العلاقات الانسانية، أو لانهم ما يحبون الخير لغيرهم، بس ”ما يظل حمل  
مطروح“

وعلى غولة أمي الله يرحمها: «باچر يدور لنة الفلك ونعلم الغالوا:  
ولك»!

## عملية ثعلب بني حمدان

تعرفون هنري كيسنجر، ذلك البافاري المولود في عام ١٩٢٣، والمهاجر مع أسرته عام ١٩٣٨ الى الولايات المتحدة الامريكية التي حصل على جنسيتها من جراء انخراطه في الجيش أثناء الحرب العالمية الثانية.

وتعرفون أنه كان حاصل على البكالوريوس والماجستير والدكتوراة من جامعة هارفرد التي درّس فيها لاحقا مادة العلاقات الدولية. وتعرفون أنه كان مستشارا في السياسة الخارجية في إدارتي كينيدي وجونسون، ثم مستشارا للامن القومي في إدارة نيكسون، ثم وزيرا للخارجية، وقد إستمر في نفس المنصب في عهد فورد.

وتعرفون أكيد أنه في عهد رونالد ريغان عين رئيسا لهيئة فيدرالية تعنى بالعلاقات مع أمريكا الوسطى، أما في عهد جورج دبليو بوش فقد كان المسؤول الاول عن التحقيق في أحداث ١١ سبتمبر.

وتعرفون أنه حصل على جائزة نوبل للسلام، لكن مالا تعرفونه أنه قال مرة - دون إن يعينيني البته، إن: «الفصل الاكثر جرأة في الازمات، هو بلا شك الفصل الاكثر أمانا في أغلب الأحيان».

لذلك: حملت (بلايسي)<sup>(١)</sup> و(درنفيسي)<sup>(٢)</sup>، وقمت بحركات تدل على أنني سأخرج لتفقد سيارتي، ولبست غلابيتي الرصاصية الجديدة (القد الطگ باکیت)<sup>(٣)</sup>، ونحرت!

اليوم سأتخلى عن كل مخاوفي وسأتصرف كما أنا دوما، فارسا حمدانيا لا يشق له غبار، وجارا يمكن الاعتماد عليه، وضعت لعمليتي إسم "ثعلب بني حمدان" ومشيت!

فتحت غطاء محرك السيارة، إضافة لغطاء صندوقها، ولبشت قليلا بالفيوزات، ودخلت للمطبخ لأسأل - تمويها - عن الكاغد جام<sup>(٤)</sup>، ورجعت!

وهي رجعة، وهي چفتة على باب بيت الجارة الكاشانية المغناج: أم حسام، فليس من الفروسية في شيء، أن ينام فتى مثلي في داره قرير العين، وچينج أوفر جارتة فيه رخاوة تجعله يجدها كلما عادت الكهرباء الوطنية، وطرقت..

وأجابني صوت تعودته منذ ١٣ عاما، يسألني: ها أبو الشباب، شعندك بباب الجماعة؟

دارت بي الدنيا - وأخوكم صايم - وشعرت أن كل فروسياتي وتاريخي السياسي والعائلي على المحك، وأردت أن أنفض عن كاهلي كل تراكمات الخوف الذي تأصل في وجداني، فقلت بحزم: «ردتلي درنفيس فحص من بيت الجماعة..»

(1) بلايس: كماشة

(2) درنفيس: مفك براغي

(3) القد: الجديد، الطگ باکیت: يعني الجديد المفتوح من علته

(4) كاغد تعني ورق، والجام هو الزجاج، وهو ورق السنفرة

فأتاني الجواب، بثقة لثيمة: «تعال.. تعال.. الدرnfيس الفحص هذا  
فوغ الشلاجة..»  
فرجعت حزينا، خائبا، منهزما، لكنني قلت في نفسي، كما قال مهزوم  
آخر قبلي: «القسطنطينية لم تفتح من أول حملة»  
.. وبكيت!

## ”سيأتيك القوس بلا ثمن”

اليوم تذكرت القول المأثور: ”سيأتيك القوس بلا ثمن”.  
 بيت أم كرار عدهم قرابه، وبعد الفطور مباشرة سيذهب (الجمل بما  
 حمل) الى بيت السيدة الفاضلة أم كرار!  
 وسيظل البيت (لمطيره)<sup>(1)</sup>، ومطيره ستقوم بحملتها الثانية على  
 القسطنطينية بلا شك!

ذهب الجميع للقرايه وللحلويات الرمضانية. درنفيساتي<sup>(2)</sup> بجيبي،  
 والبلايس<sup>(3)</sup> بيدي، طرقت الباب حتى كلّ متني، ففتحت الباب قارورة  
 العسل: أم حسام، رفعت البلايس بوجهها (لاظهار حسن النية) فتبسمت،  
 وقالت:

”هلا يماي عيني وميت هلا“

ودخلت عرين اللبؤة الكاشانية، وتوجهت نحو (الجينج أوفر)،  
 فوجدت أن (البارد) مال الوطنية راخي، فضبيت برغيه، فإستقام.

(1) «ظل البيت لمطيره وطارت بيه فرد طيره» مثل عراقي

(2) درنفيس: مفك براغي

(3) البلايس أو الجلابتين: كماشة



شكرتني، وطلبت أن أشوف لها (البلك سويچ) مال المكيف مال الهول، وغلقت الأبواب!

رائحتها ملأت المكان، وبت لا أميز الهيد أند شولدرز عن الدوف عن الباشتولي المميز في عطر الاتيرنتي الذي تصر على إذلال عواطفي به، لم يكن بلك سويچ المكيف يعاني من شيء، لكنني بلبشت به وأخبرتها أن كل شيء أصبح: تمام.

قالت: «صالح (بتشديد اللام، يمكن أم حسام حلاويه) عندي بعد فد شغنه زعنونه (گامت تخن) عندي بغرفة النوم ماتي، الكلوب مات التيل لامب، مره يشتغن مره م يشتغن، معذبني كونش م تصعد بالتابع الثاني تشوفنايه، عفيه!»

أويلي الله، شيصعدني الدرج، رجليه ما تشيلني، خاصة وهي تصعد الدرج أمامي، كأنها معمل إسفنج يرتفع بتؤدة وغنج، بإتجاه عليين! حاولت أن أمسك (محجر الدرج) بيدي لكي لا أفقد توازني، فأمتدت بإتجاه وجهي يد صغيرة، لمست خدي، ومعها صوت طفولي خفيض: «بابا.. بابا، إگعد صار الفطور!»

## فرج وهاب<sup>(١)</sup>

تتابع العائلة الكريمة هذه الأيام، مسلسل محمود عبد العزيز المميز (باب الخلق) ونظرا لتقطع البث، كلفت - من جهات عليا - بحل هذه المشكلة من خلال تحريك الصحن أو فحص التوصيلات السلكية. حملت (درنفيساتي) و(بلايسي)، وصعدت الى السطح، لأحل المشكلة.

ومن بعيد... سمعت صوتا خفيفا بطور المحمداوي، صوت ملائكي هادئ يعني:

يا زين الاوصاف جِدمك<sup>(٢)</sup> ما عليه نزل  
وإحنا بعداد الوفا، بالجلمه ما ظن نزل<sup>(٣)</sup>  
أهلنا ببو النوف إنكرونا..

الملعونه هاي أم حسام، جاي تشر الهدوم<sup>(٤)</sup>، وحست بيه فوگ

(1) مطرب ريفي شهير من مدينة العمارة

(2) جدمك: قدمك

(3) نزل: من الزلزل

(4) شر الهدوم: نشر الغسيل

## السطح!

جاوبتها بنفس الطور:

مايوم خنّا الاهل ولا يوم بعنا النزل<sup>(1)</sup>

واللي عرف ودنا يعرف أصالة وطبع

من يومكم ما شفت راحة

فأجابت وروائعها المميزة بدت تقترب من سياج السطح دون أن

أتمكن من رؤيتها لعلوه:

الجود علم بنا والكرم بينه طبع

لا تعتقد نهجرك، يا زين حلوا الطبع

ثم قلنا سوية كما لو كنا دويتو:

رغم الهجر نذكرك، وذجرك أبد ما نزل

قلت خلي أصير براسها فرج وهاب، فصرخت بطوره:

ادعي وخلي الدعوه تجارب

وي ريت السبب الفرغه تجورب<sup>(2)</sup>

حلات الوكت يا صاحب تجارب

يميز الوفي من الذاته رديه

وداعتك للنوم ما ترضاش عيني..

فأجابت، وأطراف شعرها الاسود الفاحم تترائى لي من أعلى السياج:

---

(1) النزل: هو النازل عند العرب، وتعني الضيف على مضاربهم، ويقال في المثل

الشعبي: نزل ويدبج ع السطح

(2) أصابه مرض الجرب

بعدك لا حلى المشرب ولا طاب

وخزن جرح دلالي ولا طاب<sup>(1)</sup>

عجبك لا نشد أحد ولا طب<sup>(2)</sup>

عليه وشاف شنهو الصار بيه

أخبرك ما هدت للنوم عيني

إختلست نظرة، من طرف السياج، وإذا أم حسام ببيجامتها الستان  
المشمشي على قمر ديني، وشعرها الاسود الطويل يصل لنهاية خصرها  
الناحل، خجلت أن تلتفت فتراني، وخشيت أن يبطل صيامي، فقلت في  
سري: اللهم اجعلها في عيني.. وخشيت من الله أن أكمل..

- اشوهاي بعدها صورة التلفزيون تتقطع؟

- حركت الالمبي، وضبيت الفيشه، شسويله بعد؟

- هي يا شغله الوديتك بيها ودبرتها، يا حظي؟

ضحكت أم حسام بصوت مسموع ونزلت..

وأنه لميت درنفيساتي ونزلت.. أمري لله!

---

(1) شفي

(2) دخل

## " هند رستم " تمرض ..

طرق حسام الباب بقوة مرعبة:

- والدتي تخربطت عمو، وأريد تاخذنه للمستشفى بدون زحمة!  
عن أي زحمة يتحدث هذا الفتى الغر، وكيف لي أن أصل للمشفى دون أن أصدم دعش طنعش مركبة في طريقي..
- تفضل عمو ماما فوگ بغرفتها، خلي نخليها ببطانية ونزلها من رخصتك!

غرفتها الملكية، معطرة ببخور العود الخفيف، والأثاث وألوان الستائر والسجاد تنم عن أن لهذه المكلوعة<sup>(1)</sup> ذوقا يليق بفاتنة مثلها.

أضواء الغرفة خافتة، لكن شعاع الضوء الصباحي الداخلى من شباك الغرفة يجعل الرؤية واضحة.

ممددة كأمون رع<sup>(2)</sup> بنفس البيجاما الساتان المشمشي التي أحبها، وبقايا روج نحاسي يبرز شفيتها الممتلئين، وروائحها المميزة توحى بأننا

(1) مصطلح تستخدمه عجائز الجنوب يستبقن فيه وصف الجميلات، فتقول احداهن: المكلوعة والله حلوه.

(2) إله الشمس والرياح والخصوبة في الميثولوجيا المصرية القديمة

في معمل كوكو شانيل للعطور الانشائية! والذبول الخفيف يظهر على وجهها الذي يشع نظافة..

- صباح الخير أم حسام..

- هلا دادة، هلا بيك ومية هلا

وحين إقتربت منها أكثر، همست بغنج:

- صالبح لاح أموت!

نظرت لحسام بحذر فوجدته مشغول عنا، فأبتسمت بوجهها البض،  
وخشيت أن تسقط عبرتي التي خنقتني، كيف يموت هذا الكيان الديباجي  
الدمقسى الناعم الطري الشهي؟

فكرت للحظة، هل سيدفن - الله لا يگولها - في نفس الارض التي  
يدفن فيها: شعيط، ومعيط، وجرار الخيط، وكريم عالوجه، وحسن أبو  
نخوره، يالها من قسمة ظيزى!

سألتها، بماذا تشعرين؟

فاجابت: أحس لشتي<sup>(1)</sup> نار مشتعله بيها، أروحلك فدوة!

كنت أسمع من عجائزنا مثل يقول:

«الحلو، حلو، حتى لو هسه گاعد من النوم!»

تلك الكاشانية تنطبق عليها كل الامثال الجميلة، وكل الاغاني  
الجميلة، وكل الاشعار الجميلة.

وضعت لثامها، وعباتها لتغطي معمل الاسفنج خاصتها، ولتبعد عني  
الجلطة القلبية..

---

(1) اللشة: الجسد

حاولنا أنا والفتى حسام أن نحملها بالشرشف الذي تحتها، لنضعها على البطانية التي فرشها لها على الارض، نجحنا، لكن عيناها المعلقتين بي أربكتني، حتى كدت أن أتعثر!

حملناها واتجهنا صوب الدرج، لم نستطع موازنتها بسبب انحداره، فإقترحت أن يحملها ولدها، لكنه إعتذر منها بخجل لعدم قدرته على حملها لوحده، وإقترح أن يحملها: «عمو»!

إبتسمت بخبث، ونظرت في عيني، فتلقفتها من يده وحملتها بين ذراعي، كما يفعل أي تجف<sup>(1)</sup>

تعلقت أم حسام برقبتي وهمست: على كيفك يا رشدي أباطة!  
فهمست بأذنها: تدلل هند رستم!

---

(1) تجف: تعني هنا جتلمان

## في المستشفى

القادة الأمنيين الفاشلين، خلونا نعيش في سجن كبير، سيطرة تلو أخرى..

ونحن في طريقنا للمستشفى، وكلما شاهد الشرطي (الكاشانية) ممدة على الكرسي الخلفي، وملتحفة بعبائتها، إعتذر، وقال:

«تفضل عمي!»

وحين أجيبه:

«عمي بعينك»، أسمع أم حسام تهمهم، كاتمة ضحكتها..

عند باب المستشفى، رفضوا أن تدخل السيارة إلى باب قسم الطوارئ، وطلبوا أن ننقل مريضتنا على السديّة أو بكرسي متحرك، ففضلت الكرسي، لكي لا تصبح فرجة لعيون (السينديّة)<sup>(١)</sup> الغيارى!

أمرت حسام بأن يركض أمامنا لكي (يگص باص)<sup>(٢)</sup>، وطلبت مني أن أدفع الكرسي المتحرك، وبحركة خاطفة وضعت في يدي ورقة صغيرة، وضعتها أنا بنفس السرعة في جيب الخوردة<sup>(٣)</sup> في الجينز خاصتي.

(1) سيندي: سي بند بالفارسية وتعني أبو الثلاث ورقات

(2) يقطع تذكرة للدخول للطبيب

(3) جيب الخوردة: جيب صغير توضع فيه العملة المعدنية المسماة خردة



«بسيطة.. بسيطة.. ماكو شي»

قالت الطيبية الحسنة مردفة: «هاي صايرة عندج صخونه بعظامج، هسه تضربين أبرة، وفد ربع ساعة، وتصيرين زينة.»

ثم توجهت بالحديث لي بينما أم حسام تكتم ضحكتها كالعادة:  
«لازم تخليها ما تتعب بشغل البيت ولا تسهر، ويرادلها تغذية زينه بهاليومين، وعصير يرتقال فريش، ومعلاگ<sup>(1)</sup> مستوي ع النص..»  
- دكتورة، راح أجيلها طن يرتقال، ويك أب معلاگ،، كافي؟  
ضحكت الدكتورة من كل قلبها، وتوجهت لام حسام قائلة:  
«نياالج!»<sup>(2)</sup>

«يهنيج ربي.. دادة ويحفظج لشبابج»

أجابتها أم حسام وهي تبتسم وتنظر لي، ولأول مرة أنتبه لبياض أسنانها الناصع.. أي غضب هذا!  
خرجنا من المستشفى.. وبعد ساعة، (الكاشانية) إنخفضت حرارتها بشكل كبير، لكنها تتأقل بمشيتها متكئة على ولدها، وأنا سبقتهم لأجلب سيارتي، ركبت في الكرسي الخلفي، ركب حسام إلى جانبي.

- زحمنك عمو، قال حسام..  
- كل زحمة ماكو، إحنه أهل، جوابته  
- إي والله أهل، قالت الملعونة...!  
حين وصلنا للبيت، لم أجد أحدا ينتظر في الباب، كما كنت أخشى، لكنني حين دخلت وجدت من ينتظرنني في الحديقة..

(1) المعلاك: هو الكبد والقلب في المواشي

(2) هنيالك

- هاي وين چنت؟ [سألتنی بطریقه توحی بأنها تعرف الجواب مسبقاً!]
- م علیج<sup>(۱)</sup> [أجبتھا ببرود ودخلت ..]

---

(1) لا یخصّک هذا

## طوط.. طوط

قلق، كلش قلق ظليت البارحة..

ترى هل عادت لها الحمى ثانية؟

هل أكلت معلاگا وعصير برتقال طبيعي كما أوصتها الطيبة؟

هل نامت؟

وهل لا زالت تحس بأن لشتها شابة نار؟

خرب بيتي عليها!..

فجأة، تذكرت الورقة التي دستها..بيدي حين ذهبنا للمستشفى،

فقفزت من سريري [بس على كيفي] وبحثت في جيوب بنطالي عنها،

وأخذت موبايلي ونزلت لغرفة الاستقبال.. قبل أن..

- وين؟

- للتواليت [مركز شرطة موبيت!]

فتحت الورقة، رقم موبايلها كما توقعت، وتحت كتبت إسمها: غادة،

الله الله، يا له من إسم لذيذ.. صفر، سبعة، ثمانية، صفر، واحد، صفر،

ثلاثة، خسه، سسه، نين، أبعه:

طوط.. طوط

- آنو

- الو
- منو؟
- رشدي..
- عابتلك
- ليش؟
- هسه يالله تذكنت تخابن (تذكرت تخابر)؟
- نسيت الورقة
- نسييني؟
- هو أنتي تنسين، عادة؟
- فدوة أروحلك
- حبييتي..
- لاح أذوب
- وأشرب حبوب؟
- هههههههههاي
- شلون صرتي؟
- ماني طويبة<sup>(1)</sup>؟
- خيرج؟
- أحس حرارة بعظامي، وواوة بگلبي!
- آخذج للطيب هسة؟
- وتشيلني؟

---

(1) مريضة



## قلب الرجل

يعتقد البعض أن قلب الرجل لا يتسع إلا لامرأة واحدة، وهذا وهم، لا أدري من أطلقه، ليصبح من البديهيات لفرط ما كرر..  
الحقيقه أن قلب الرجل يتسع للعديد من النساء، لا أقول أنه گراج!  
لكنني أقول:

إن الرجل يحب وهو مراهق، ثم يحب وهو شاب مكتمل الرجولة، ثم يحب وهو ناضج، ثم يحب وهو في منتصف العمر، ثم يحب وهو كبير في السن، ولكل حب نوع من النساء يتناسب مع المرحلة التاريخية، فإذا جمعنا كل تلكم النساء، زائداً ال (منا ومنا)<sup>(1)</sup>، زائداً (إذناك خشمك)، يكون القلب عبارة عن ساحة صغيرة لوقوف ومبيت السيارات، وهو على أي حال ليس گراجا كما أسلفت!

يقال أن الزوجة الاولى يقدم عليها الرجل لاسباب وضغوطات معينه معروفة، يتجاوزها بعد خمس الى عشر سنوات، ليجد نفسه بحاجة الى زوجة أخرى تتناسب مع ارهاصات وحيثيات المرحلة الراهنة!  
بالنسبه لي فإن إرهاباتي وحيثياتي تفرض علي بما لا يقبل المناقشة الارتباط الفوري وغير المشروط بالسيدة أم حسام..

(1) من هنا وهناك

أنا أمر بأزمة منتصف العمر، وهي تمر بحالة ضياع وتشتت عاطفي -  
إذا صح تعبيرها - لذلك قررنا السير بخطوات ارتباطنا الى منتهاها.  
اليوم إشتريت قاط<sup>(1)</sup> لونه (كريمي)، حسب طلبات العروس، وقميص  
كريمي، وربطة عنق كريمي، وحذاء كريمي، وبالضرورة طبعا - جوارب  
كريمي..  
خبأت القاط في نهاية الكنتور مع الملابس الشتوية، لكن (النباشة)  
لغفوه!

وسألوني:

- شني هذا القاط البيجي المن؟ مشتريه؟ تريد تعرس شني؟
- معزوم بالعيد
- وين بسبيريا؟
- بدون تصنيف<sup>(2)</sup> رجاء، معزوم عد رئيس الجمهورية.
- محمد مرسي؟
- أووووووو
- على كيفك لا تزعل! أتشاقه وياك، بس شنو المناسبة؟ إشمعنه  
إنت يعني؟
- هو عازم هوايه كتاب وصحفيين وفنانين..
- وإنت شنو.. طه حسين؟
- أووووووو هسه أنه غايل: أنه طه حسين!
- على كيفك ليش تزوج من واحد يسألك؟

---

(1) بدلة

(2) مزاح أو إستهزاء





## الزواج.. استقرار

دوخة ما بعد الفطور، والشاي، والسيكارة، تضطرنني للصعود الى الطابق الثاني، (لأتمدد) لساعة في غرفتي.

أثناء صعودي الدرج، وصلني مسج من (أبو علي) الذي يعرف عادتي تلك، يطلب مني أن أصعد لسطح منزلي، فصعدت.

رائحة المعسل غمرتني بمجرد أن فتحت باب السطح، إضاءة خافتة من عدة ألوان تزين سطح بيت (جمارة القلب)<sup>(1)</sup>، رفعت نفسي قليلا ونظرت من أعلى السياج، وجدتها جالسة على كرسي من الخيزران ويدها (قمجي) النركيلة، تحيط بها سنادين النباتات، وبجانبتها كرسي واحد فارغ، وطبلة صغيرة.. عليها ما لذ وطاب من الحلويات، وحين رأنتي مقبلاً بوجهي، وقلبي، وكليتي، وكل جوارحي، أنشدت تغني:

- عايذة أعرف طريقي فين لحبك؟

قفزت السياج كما أبطال الزانة، وأكملت أغنيتها:

- وبدور وأقول أنا فين في قلبك؟

- غلبت أدور.. وإحترت أكثر..

- حرام عليك تنام عينيك

(1) الجمار هو قلب النخلة، وهو شديد البياض



## كولولوووووش

” ليس المهم أن يكون المرء شريفاً وفاضلاً دائماً، بل كيف يستخدم الفضيلة والشرف.. وليس المهم أن يكون رحيماً، بل عليه ألا يسيء استخدام الرحمة“

ميكيا فيلي

سيد جليل: قولي زوجتك نفسي

أم حسام: زوجتك نفسي

سيد جليل: بمهر قدره

أم حسام: بمهر قدره

سيد جليل: عشرة ملايين دينار مقدما

أم حسام: عشرة ملايين دينار مقدما

سيد جليل: وخمسة وعشرون مليون دينار مؤخرًا

أم حسام: عشرة ملايين مؤخرًا!

سيد جليل: مو گلتوا متفقين على ٢٥ مليون؟

أم حسام: إي، بس هوايه الـ ٢٥ خطية!

سيد جليل: قل قبلت التزويج

آنه: قبلت التزويج..

أم عبد الرحمن: گولولولولولولولولولوش

سيد جليل: مبارك لك زواجك يا أبا نايف، مبارك لك زواجك يا أم

حسام.. أستودعكم الله

آنه: الله وياك سيدنا

أم حسام: الله وياك عيوني

أم عبد الرحمن: گولولولولولولولولولولولولولوش

## شهر العسل

يگولون ربعنا: «تلاثة ما ينظلبن: المرة، والسلاح، والسيارة» ..  
الحقيقة الاولى ما بيها مجال، بس السلاح والسياره بيهن مجال  
ينظلبن، من الاخ والصديق وغيرهم.

انا طلبت سيارة صديقي عادل (المهافي) المشمشي على قمرديني  
[أحب هنيج ألوان]، وباچر راح أعيد، سواء طلع عيد لو ما طلع!  
أي كافي، رواحنة بزعت .. وبعدين أنه زلمه عريس!  
شافوا الهلال لو عساهم ما شافوا، حاجز باچر بالمنصور ميليا<sup>(١)</sup>،  
سويت بالطابق المدري شگد.

غسلت السيارة غسله من هاي أم الخمسة وعشرين الف، ورشيتها  
رشه خفيفة من عطر (جادور) اللي تحبه، عادة ..  
فولت بانزين، وچيكت التبريد، والتايرات، وجبتها قريب البيتنة،  
وضربتها چادر<sup>(٢)</sup>، حتى لحد ينتبهلها لو يسأل عليها.

رجعت للبيت، وگبل للحمام، ظليت تلت ساعات، جلفت جلفة مال

(1) فندق المنصور ميليا من اشهر فنادق العاصمة بغداد

(2) الجادر: قماش سميك يستخدم كغطاء لكامل السيارة من الخارج



## أبو الكريمي

كل السيترات<sup>(١)</sup> اللي مريئة عليها، ما عطلونه ولا دقيقة، كلهم  
يضحكون الملاعين من يشوفوني لابس القاط الكريمي، وام حسام  
غاعده بالصدر ولا بسه بدلة العرس، والدنيا غبشة<sup>(٢)</sup>، خو أكو جندي  
بسيطرة المسيب اخذلنه تحية.. ومن نزلت الجاهه أسلم عليه غالي:

روح أبو الكريمي بس إنت باللعب!

بسيطرة الدورة، فتحلي الضابط العارضة مالت الطريق العسكري،  
وگالي:

إتفضل عيني أبو الكريمي بس إنت على الراس!

تضحك أم حسام، وهي تشوف العراق كله فرحان، بما فيه الجهات  
المعنية والجهات المختصة..

وصلنا للفندق، ورفعلي العارضة أبو (باب النظام)، گلته:

صباح الخير عمو..

- صباح النور، عيون عمو.. بس إنت باللعب أبو الكريمي!

(1) نقاط التفتيش

(2) فجر

وطبعاً، أم حسام.. تضحك!

من رده نصعد، بالمصعد زرغت العامل مال الجنط بعشر دولارات،  
وكتله اصعد گدامنه خلي الجنط بالباب وافلت، ما أريد أشوف خلقتك،  
حط الفلوس بالجيب ولگف الجنط وفلت بالمصعد الثاني وهمسلي:

بس انت باللعب أبو الكريمي!

بس انطبگ باب المصعد حضنتها، وما أحس الا (البت) أغمن عليها..  
شلتها على ايدية وطلعت من المصعد كُبل ع الغرفة لگيت الباب  
مفتوح والجنط جوه، والعامل ماكو.. نزلتها بتؤدة، كلش بتؤدة على  
السرير..

باواعت بعيوني وگالتلي:

- معقونه تحكك حلمنا؟!

- الله ما يعطل حبيبي

- بس انت بالنعب أبو الكريمي.. هههههه!



## الصباحية

اليوم، أم حسام لابسة ثوب رصاصي فاتح، شكله وقماشه مثل تي شيرت طويل، وبه صورة كبيرة لميكي ماوس!

الحقيقة طالعه چنها بالاول كليه شعبة الباء، الثوب ضيگ شويه - العرض واحد - لذلك گلتها من باب التلميح لا التصريح: مو شوية صيفي هذا ثوبچ، واخاف باردة عليچ!

گالت: نا (لا)، مو باند (بارد)..أصلا الثوب هذا نبيعي (ربيعي)!  
الريوگ اليوم، خبزة حارة استوها مخبوزة، وطاوة بيض وطماطة، وجبن أبيض، وجبن مثلثات، وزيت وزعتر، وأكو شيشة زغيرة مال غسل ماركة السنبله، أريد أشربها كلها  
من بعد الريوگ..

واليوم لو أنا لو النبيعي!

## تماهي

من قال إن الزواج الثاني يجعل الرجل يمشي ويحُك.. بعلباته<sup>(1)</sup>؟  
 من قال إن الزوجة الاولى تسعى حتى مماتها - الله لا يگولها - لأن  
 تثبت أن «الارملة المفعوصة»، «گماعة الزلم» أم «خسفة بظهرها»، «الحية  
 أم خنة»، لم تكن إختيارا إستراتيجيا سليما، وإنما كانت «دگة نواقيص»؟!  
 من قال أن الزوجة الثانية يصبح كل همها إثبات أن «حياتك قبني  
 (قبلي) عدم»، و«محد يعنف (يعرف) يسويلك شاينيز مساج مثلي»  
 وشلون عايش وي هاي اللي نص وكتها تخلصه تجنف (تجلف)  
 بالحمام»؟!!

هذا الكلام ليس صحيحا، بالمطلق، والحقيقة أن أعداء تجربة التعددية  
 هم من يطلقون هذه الأقاويل البائسة..

لعلمكم، أصلا بعد فترة من الزواج الثاني، تصير الزوجتين صديقات،  
 وتصير بيناتهن حتى تبادل لياالي، ومنافسة شريفة لارضاء الزوج السعيد،  
 من خلال التضحية والتماهي!

اليوم الصبح، مثلا، انطيتهن كل وحدة چم فلس حتى يشترن ملابس  
 وشغلات الهن.

(1) خلفية الرقبة

من رجعن من جولة الشوبنگ، تفاجأت بكمية التماهي اللي صايره  
عدهن خطية!

تصوروا - بس بدون حسد رجاء - مشتريات بكل الفلوس عطور  
وقمصان وكريمات وشامبوات واكسسوارات وبجايم ستن.. وگلیبات  
ململ لحضرت جنابي!

آني كولش فرحت، وإرتبكت، وحتى گوذلتي تخربطت، من گد  
التماهي اللي جاي يحصل! بيناتهن..

## زي الفريك

تظهر سيدة جميلة لابسة بلدي وبكامل زينتها، وتدعى «جماليات» أو «عنايات» أو الست «أم زينهم»، وهي تهتز من رأسها حتى أخمص قدميها، تضع طرف سبابتها على اعلى حاجبها الايمن، وتقول: حابس.. حابس، أنا زي الفريك ما بحبش شريك!

تلتقط هذه العبارة أم كرار وأم زينب وأم عبد الرحمن، ليسمنن بها أبدان: أبو كرار وأبو زينب وأبو عبد الرحمن، الذين صادف أنهم فكروا، مجرد تفكير، بأن يجعلوا حياتهم أكثر اشتراكية..

لم تفسد المسلسلات المكسيكية والتركية عقول نساءنا بقدر ما أفسدتها الافلام والمسلسلات المصرية، التي تجب مقاطعتها وتحريم مشاهدتها!

لدي صديق قالت له زوجته البارحة حين لمح لها - صديقي مو أني والله - بأنه يفكر أن الزواج من أخرى يمكن أن يحل مشكلة المليون أرملة الموجودة في المجتمع العراقي!

فما كان من زوجته إلا إن قالت له: شوف أبو.. [منريد نجيب أسماء] إذا تزوجت عليّ سأضع رأسك تحت عجلات السيارة وأفرمه، أنا على كولة المصريين «زي الفريك ما بحبش شريك»!

تصوروا.. مستعدة لفرم رأس زوجها لمجرد أنه فكر بحل مشكلة وطنية، يا لظلم الانسان لأبن جلده، ويا لتأثير الدراما على القوارير! وفي السياق ذاته، صديق آخر، قالت له زوجته: إذا فكرت مجرد تفكير بالزواج بثانية، ستصحو لتجد نفسك مقطعا إلى ١٦ قطعة، وكل قطعة موضوعة في كيس بلاستيكي أسود، وكل كيس مشمور في حاوية نفايات شكل، وستظل الشرطة لشهرين كاملين تجمع بأشلائك، «أنا زي الفريك ما بحبش شريك».

ما هذا العنف الاسري الحاد، ومن أوصل الجنس الناعم الطري الغض الى هذه المرحلة من الاجرام والبخل بالشراكة الوطنية؟ إنها المسلسلات المصرية التي يجب منعها وتحريمها بفتوى كالتى حرمت التظاهر وخلصتنا من شروره!

شخصيا، لا أعاني من هذه المشاكل بتاتا البتة، فأنا متزوج بسيدتين محترمتين جميلتين، لا تتأثران بالترهات والاجندات الخارجية التى تبثها مخابرات دول إقليمية من خلال الدراما.. المصرية.

وهن غير مشمولات بالاجتثاث، وبالتالي ليس لديهن خلفيه عنفية كاللتى لدى حزب البعث وتنظيم القاعدة!

الحقيقية أن (النظام الداخلي) الذي وضعته لهن، والذي تم التصويت عليه بالاجماع، يحدد (التوازن الوطني) المطلوب، وإذا حدث أي تجاوز مني على (أحد المكونين) فيمكن وبحسب النظام الداخلي - السالف الذكر - الدعوة لجلسة إستثنائية وتصحيح مسار عائلة (الشراكة الوطنية)!

حتى إذا أردت الزواج بثالثة، فإن النظام الداخلي لا يمنع ذلك مطلقا،

بل ينظمه بجلسات استماع وإستجواب ومن ثمة تصويت، نحن عائلة  
ديمقراطية تؤمن بالشراكة الوطنية. إضافة إلى كوني أمتلك حق الفيتو،  
وعصبي.. عصبي جدا، ولا أخضع للتهديدات أبدا، ولن أسمح لأحد أن  
يهددني علانية!

فأنا لست مثل ابن عمي أبو وليد الذي قالت له زوجته أم وليد - ذا  
خميس قائض - مهددة ومتوعدة: والعباس أبو فاضل، بليلة اللي تعرس،  
أنا أعرس!

## تن تن تن

في الغالب، تدل نغمة الموبايل، على ذوق صاحبه..

هذاك اليوم، كأعدين بفاتحة، وطب عليه سيد، من ذولة اللي ما  
مصديجين هم من (خلفة) النبي (ص)، فهو يضع على رأسه كوفية خضراء،  
وعلى كتفيه كوفية خضراء اخرى لكنها في الحقيقة كبيرة ومزركشة،  
ومحزّم بوصله خضره، ولابس دشدشه سوده، وعكاله أسود ولحيته  
سوده، وهو أبيض كطن!

انتبه الى دخوله أحد أولاد عمومته وهو رجل من العقلاء، وقال:

«إچاكم العباس أبو فاضل!»

"ضحك الجميع بصوت مكتوم، فالجميع يخافون (شارة السيد)،  
الذي بإمكانه - بحسب والدي - أن «يموع الحديد» بكسر الحاء طبعاً!"  
حينما رن موبايل السيد الذي يشبه «العباس أبو فاضل» كانت النغمة  
بصوت عالٍ جداً تصرخ:

لسة فاكر قلبي يدبلك أمان..

وله فاكر كلمة ح تعيد اللي كان

الشركات المنتجة للموبايلات، تُجري بحوث كثيرة لتختار النغمات  
التي تضعها في هواتفها المحمولة، وهذه النغمات يفترض انها تناسب

جميع الاذواق، وتتسم بالرقى.

بالنسبة لي، أضع في هاتفي نغمة (صوت الزجاج) بصوت هادئ مع الهزاز، اليوم رن هاتفي قبيل الفطور بنصف ساعة: تن.. تن.. تن.. تن

- ألو

- أنو

- شلونج؟

- هلاو، شونك، مشتاقتك بذات!

- هلو.. هلو.. شلونك أبو علي شلون صحتك؟

- هاي شنو لازم إجه يمك أحد..؟

- ههههههاي إي والله، شنسوي بعد!

- ههههاي شوف آني عازمتك. مسويتلك فطور خاص، تشريب

بانيه ولحم ضلوع، وسالگتلك فروجة زغبرونه، وتمن باگله

وروبة، وشوية تمن طماطه، ومحليبي، وكاسترد، وشوربة،

وشوية هريس، وشاويه سمجة زغبنونه وعليها حشو يجنن،

وزلاطة خضرة، وحمص بطحينة وفتوش، وسلطة زيتون،

ومايونيز، وتبولة، وجايبتلك تحلي بكنافة جبن خشنة وناعمة،

وكنافه بالگيمر، على بقلاوة، وزلابيه، وبرمة، تحب البرمة؟ أني

أموت عليها، وشوية زنود الست، ولقمة القاضي، وسويتلك

عصير نومي بصره، أعرفك تموت عالبحره هههههه، وعصير

تمر هند.. وحسام جابلنة عصير زبيب طبيعي، وگلت يمكن

تحب قمر الدين، بردتلكياه بالفريز وي عصير البرتقال الطبيعي

وعصير الفيمتو اللي تحبه، بس تدري حتى لا أنسى: إننت تحب



لبن أربيل هذا المدخن آني أموت عليه، راح أحضره إلك تفطر  
بيه وي (شعثة) التمر بالدهن الحر والسمس، أگلك إنت تدخن  
ماليورو سحب لو تحب أحضرلك نرگیلة أناناس بحریني؟  
ألو.. إنت ویاة؟

- أي ویاچ

- وأرید أگلك شغله بس لا تاخذ علیه غیر نظره، إنت ما قاري  
بالقرءان الآیة: اللی تگول «أحل لكم لیلة الصیام الرفث الی  
نساءكم»؟

- أي قاریها؟

- زین یعنی تعرف تقره..؟

- إي أعرف!

- إنت وین هسه أشو متحجی، مخلوس شنو؟

- أنه بیابکم، فتحیلی الباب.. بسرعة!

## شور جيل

بالله عليكم: يعني هذا اللي اخترع الـ(شور جيل) مو يمكن أول واحد يدخل للنار وبدون حساب؟

بالسته وخسة يومياً، تطلع السيدة أم حسام من الحمام، بعد أن أخذ منها (شور جلها) مأخذاً، والروائح العطرة النفاذه، تصل بسرعة الضوء الى خياشيمي ومن ثمة الى قلبي الضعيف الصغير المنعول الوالدين! وأظل أنتظر الأذان على أحر من الجمر، وتظل هي تتفتل على چلاوي الخلفوني، تروح وتجي، تصعد وتنزل، تتنهد وتتأفف، وكل شويه تخطف عليه على اساس رايحة للكوليدور وترجع، وعلى اساس ما تشوفني الملعونة، تهول گدامي فتهتز الدنيا وما فيها..

يمكن أم حسام عدها معرفة بطب الروائح (Aromatherapy)، ويمكن تدري أنه في بعض السوبرماركتات العالمية يرشون روائح تخلي الزبائن يقبلون علي شراء السلع ويقضون أطول فترة ممكنة في المكان.. تدرن باليابان يرشون رائحة الفلوس الجديدة لجعل الموظفين يعملون بشدة ويتكالبون علي مضاعفة الإنتاج.

طبعاً بعض المحلات أيام الكريسماس تضع غلايات بخار ماء تنبعث منها رائحة زيت شجرة الصنوبر ليوحى للزبائن بجو عيد الميلاد وشجرته

الصنوبرية.. وبعض المحلات تضع زيوتا عطرية بأجهزة التكييف لتنبعث منها روائح تتناسب مع ما يباع من سلع في هذه المحلات لترويج بيعها.. وهذا الأسلوب يتبعه في العراق (حميد مصلحة) أبو مطعم كباب بالأعظمية، يحط بالمنقلة قطعة (ليّه) فوق الفحم لتعقب الرائحة الشهية ويجذب بها الزبائن..

السيدة أم حسام تعرف بأن عطر الفانيليا يفقدني سيطرتي على الأمور، لذلك فهي تختار أنواعا من الشاور جل يحوي هذه النكهة الساحرة! المهم، أريد اشوف ياهو اللي راح يطبب هالمخترع المستهتر بالجنة؟؟

## ريحة بصل

طبعا أم حسام أنيقة بشكل مبالغ فيه بالبيت، ويمكن تبدل تلت اربع مرات باليوم، وكلما أسألها: ليش بدلتي؟ مونفونفج يخبل!  
تقول: أخاف صار بيه نيحة بصل من المتبخ!  
من بدة رمضان ولليوم، أم حسام عدها سؤال شبه يومي تسألني بيه:  
”ببة ريحة بصل؟“

طبعا لا ريحة بصل ولا ريحة ثوم، هي أم حسام عبارة عن محل عطور وشامبوات يمشي على الارض. ودائما أجابوها نفس الجواب، وبعد الجواب لو تخنغني العبرة، لو أشبع بواجي على ضيمي!  
المشكلة كلما تبدل بشي ضيغ شوية - العرض واحد - تحط إيدها على بطنها الكريمة «المسح»، وتسألني:

أگونك، ترة آني صاير عندي كنش (كرش)؟ موبلة؟

آنا طبعا أظل أناشغ، خوفا وطمعا!

أگلکم: ترة طولها رمضان، شنو هاللعبان النفس؟

## إحضر حالاً

كلش أنزعج من صوت الموبايل، خاصة إذا نايم، أو منطرح، أو  
مسلمهم..

قبل شويه اجاني مسج خربط أحوالي، المسج من أم حسام:  
«إحضر حالاً»!

زين أنا اليوم بايت بفرقة (هدعش)، وقائد الفرقة يفتر على راسي،  
وعسى ما تحرك روحك

يمنى لو يسرى، الا واجاك السؤال يهف:

ها، وين رايح؟

وانا مختار شلون راح افلت؟

شصار عدها أم حسام؟

بس لا طگت الكهرباء عدها؟

بس لا مريضة ومحتاجه تروح للمستشفى؟

بس لا حسام فجر نفسه؟

بس لا وگعت من الدرج؟

بس لا زلگت بالحمام؟

شلون يا ربي؟

شلون يا رسول الله؟

- هاي شبيك تحوص؟

- ها، لا ماكو شي، راسي، قصدي بطني توجعني!

- كله من ورا المكيف، وانت الله يحفظك تسبح وتنام مصلخ  
غبالة!

- أي أي، المفروض ما أسبح!

- هاي شبيك؟ أكوول عيني رشدي أباطة، آنة رايح ازرك لبيت أم  
روان، أجيب عبايتي من يمها وأجي، خمس دقائق وراجعة، زين؟

- زين.. [الحمدو لله والشكر، الف الحمدو لله والشكر]

- طفرت لبيت أم حسام، لگيت باب المطبخ مفتوح وهي ماكو،  
طيبت للهول ماكو، صحت: أم حساااااام؟؟

وچان يجيني صوت سيتهاهاگوبياني من فوگ:

- تعال الحگلي!

- انا اخو زناد..!

سويت الدرگ شبختين.. لگيتها ملففة بروب لونه نيذي مدري  
لازوردي، والشعر ملفوف بخاولي بلون الروب، ومشمور ليفوگ،  
ومطلعه زندها - العرض واحد طبعاً - أبيض چنه هذا الجبن التركي اللي  
يجي بتنكه ووياه ماي وملح، وگالتلي:

- تعال شوف شصار بيه؟! بگايه<sup>(١)</sup> گرصتي.. إيهناه وإيهناه!

- أنزوول للبگايه..

## صار

- كينو نحم هنفي نغبه (كيلو لحم هرفي<sup>(١)</sup> رقبة)
- صار
- بطيخة أناناس<sup>(٢)</sup> حنوه شكن (حلوة شكر)
- صار
- نعناع ونيحان وكنفس وفجن أحمر
- صار
- ومن تطلع نصي السبنت<sup>(٣)</sup> خنيه عل اللو (low)
- صار
- تظفي المفنغة (المفرغة<sup>(٤)</sup>) مالت المطبخ
- صار
- ومو ينطيك النحم كونه (كولة) شحم وعظام، مو تجيني تگوني
- إستحيت أحجي وياه

---

(1) الهرفي هنا يقصد به الحروف الصغير

(2) بطيخ أناناس: نوع من أنواع الشمام

(3) السبنت يونت (مكيف الهواء)

(4) مفرغة الهواء او الشفاطة

- صار
- ومو تجيني بطيخ غير الاناناس، ومو تگوني «مة لگيت، لأن تارس السوگ»!
- صار
- والخضنه (الخضرة) مو ذبلانه وشحالها ممروده بالعناگه (العلاگة<sup>(1)</sup>)
- صار
- ومن تجي مو تتغدى وتذب روحك قتيل<sup>(2)</sup>، عبالك جاي من الجبهة، هم گول عايشين ويای بشن (بشر) والههم حقوق..
- صاااار!!
- يلة چاو..
- [بالله هسة الواحد إذا ينزل يجيب الساطور أبو الخمسة وعشرين ألف ويسويها كباب
- بالساطور، هم واحد يلومه!!]
- هاي شيبك تدندم (تدردم)؟
- لا ماكوشي، چاو حبيتي چاو..

---

(1) الكيس

(2) قتيل



## عطلة

قبل شوية من رجعت من الدوام: لگيت أم حسام مسشورة، و متعطرة،  
وفد (ميك آب) خفيف نحاسي، ولا بسة البيجاما المشمشي الستن إياها!

سألت: شنو اليوم خميس؟

فأجابت بخبث: نا (لا)، أنبعاء (اربعاء)، بس انطوها بالعنانيه (قناة

العراقية) باچر عوتله (عطلة)!

- هااا

- لا هاا ولا باا، انا مزاعلتك ما أحبك ما أنيدك

قلت بشگل:

- خير خو ماكوشي؟

فأجابت بغنج:

- إنت صاين باند، وما تغازني، وما تندشني، وما تدنعني، ولا

تگوني كنام (كلام) حنو، ولا عبانك (عبالك) عايش وياك بشن

(بشر).. شنو انت گنبيك (قلبك) جنمود (جلمود) خو مو جنمود،

روح ما أحبك ما أنيدك.. مزاعتك!

وصعدت فوگ لغرفتها..

ها يابه..

## زعل الحبيب

- حبيبي
- ما
- حياتي
- ما
- حياتو
- ما
- حياتم
- ما
- مو قصدي والله
- ما
- والله مو قصدي
- ما.. كن منه تگون هيچ! (كل مرة تگول هيچ)
- أرجوچ!
- ما
- شدةوة!



- ورد انت ههههههههه

- ههههههههههههه

عمر ويخلص كله تو سئل!؟

## الچیحة!

نادرا ما تخبرني أم حسام لأن لازگه بيّه «أنبعه وعشرين ساعة»، على حد تعبيرها..

اليوم وأنا طالع أمارس رياضة المشي يم الحاوية، و(هيدفوني) بإذاني، وخوليو يصرخ:

«مونامي، بوناوي غاجولي بيا..»

رن الهاتف، فانقطع إكليسياس، وجاء صوتها الساحر - طبعاً فوگ ضيم الله منشوله وخشمها مسدود - وهي تغني بحنجرتها الرائع:

«لا حوت مثنك

بندة الحنة

ولا قضا طوينيج ياننوحتي

ولا النجف كنه

سنوتي انت

وبيك اتسني

ولو نحت عني ياننوحتي

من يسنيي»

مدري أذوبن؟ مدري أموعن؟ مدري أذب روجي نجخ بالچيحه<sup>(١)</sup>؟

---

(1) بقعة ماء أسنة

## آنا من آگولن آه

مو حلو المرض ومزعجه أمراض البرد والصداع وحمى العظام  
القاتلة..

بس من تكون عندك زوجة مثل أم حسام.. يختلف الوضع!  
مساج لظهرك ورجبتك - يابنادم - بزيت الكالبيتوس مع موال وأغنية:  
ياخشوف ال تَمُر بالبصرة  
أما ريوگك فيصير عبارة عن فروجة مسلوگة مع نومي بصره وبصل  
العظيم، مع موال وإغنية:  
دادة.. حسن..

والچاي بالمرمية يتبعه بعد ١٧ دقيقة، زنجبيل.. بالقرفة ساخن، يتخلله  
تدليك للرقبه وموال وأغنية:  
آنا من آگولن آه وأتذكر أيامي!  
وتلفلك بفروه بدوية بنية اللون، مع جواريب قطنية بلون كريمي، مع  
طخطخات مستمره بحجة المريض يحب دفو!

## الناس الراقية

حقيقةً، الناس الراقية، أمراضها هم راقية مثلها، وأسباب وفاتها - الله يحماكم - هم تكون راقية...

يعني مثلاً مثلاً عمّة أم حسام السيدة (رثيفة) توفت عن عمر ناهز ال ٩٣ بعد أن أصيب صمام القلب عندها بالتهذّل، بينما عمّتي السيدة (حتروفة) توفيت عن عمر ناهز ٥٧ ربيعا أثر (زگطه) من الهايشة أثناء فترة الحلب الصباحية!

اليوم رحنا أنا وأم حسام لطبيب أمراض الجهاز الهضمي، وكانت ترتدي بنطلونا كحلي اللون من قماش الشاموا الخفيف المطبوع بزهور كبيرة الحجم - تقول أنه الفاشن مال هذا الخريف - مع قميص حريري كحلي هو الآخر، وإكسسوارات تقول إنها كاريبية..

المهم شاهدنا على الرقة، خرجنا من الطبيب وكل منا يحمل وصفته الخاصة، فبينما شخص الطبيب حالي على انها التهابات في مكانات ما تسولف -والله مو مثل خالد العطية وحق هو الله - شخص الطبيب حالة أم حسام على أنها اضطرابات بسيطة في الكبد نتيجة الافراط في تناول العسل الطبيعي أبو ال ٥٠ ألف، مو هذا السنبله أبو ثلاثة وربع..

وكلمن وطبقتة الاجتماعية!



## انذار (ج) (١)

اليوم انكلمت الدنيا.. دخلنا انذار (ج)..  
 انلعب بيته طوبة..  
 انخبصنا..

الزلم تصيح: الله وأكبر..

النسوان تصيح: الله لحد..

الجهال تصيح: هي هي مخبل..

الشباب تصيح: لبيع<sup>(٢)</sup>، لبيع..

وأنا أركض منا وأرجع منا..

صياح بيت أم حسام، وأنا بايت بيتي..

الاهل بالبيت يضحكون ويهزون بإيديهم..

أنا ما مغسل وجهي، ومذگن، وراسي كفشه، وخشمي....

غلايتي الصفرا لبستها بالمكلوب تلت مرات، طلعت.. بدون

شحاطة، أركض وأنجیح..

(1) حالة التأهب القصوى في الجيش العراقي

(2) ينادى بها على السكران

المهم، طببت للبيت، بعد أن دفرت الباب - چنت لاعب جودو كراتيه  
بالرابع عام - ولگيت أم حسام بالمشمشي المعتاد، ورائحة الدراق تملأ  
المكان، ودرجة الحرارة بغرفتها يمكن ١٥ سيليزي، ومبرطمة وتبچي!  
گلتلها: خير، شبيچ يا بعد طوايفي؟ شبيچ يا ماي عيني؟  
گامت تبچي وگالت: صنوحتي.. السبلت يکُت مي على ناسي!

إسّه

## ماكو عشا

الرجل بالبيت لازم يكون عصبي وحِمْش، ونار وشرار، مو يصير  
بارد وفكاكة وفاهي!

النسوان المسنّعات ما يحبن الرجال الأثول، يحبن زلمه ينشّف  
الدمعة، وهب ريح..

أنطيكم مثال توضيحي من خبرتي الدولية بهذا المجال، ومن خلال  
حياتي الأسرية، مع السيدة الفاضله المعتبرة المكّملة أم حسام..  
البارحة، رجعت متأخر للبيت، حوالي الساعة طنعش الا خسة، لگيت  
الوجوه مو وجوه أهلها!

بس أنا ولا يهمني، ولا أشتري أكبر واحد بست فلوس.  
غسّلت وگعدت بالهول، وخليت رجل على رجل، وصحت: عشا يا  
مرة..

إنلبست<sup>(1)</sup> ومحد جاويني..

صحت مرة الثانية: شنو ماكو عشا اليوم؟

---

(1) أهملت

هم محد جاوڤني، وسمعت حس رجلين صعدن الدرج.

أمممم عافتني أم حسام وصعدت تنام..

ههههاي، اليوم أسوي شي ما صاير، اليوم الدنيا تنجلب، صدغ  
چذب، أنا أظل بغير عشا، وسفه عالزلم والله..

عندي طبعاً ساطور بالمطبخ، من هذا أبو الخسة وعشرين ألف، بعده  
بالباكيت، ويكص الشيلمان..

طيبت للمطبخ، فتحت الثلاجة، لكيت قطعة لحم بعجين معضوذة  
عضتين، وبطل سفن باقي بيه نص ربيع، جبتهن واجيت للهول، ضربتهن،  
وتريعت..

هههههاي يگلك ”ماكو عشا“..

أنا عندي ”ماكو عشا“!

والله يا الله..

الجو أحرگه، وعلي!

## تلفزيون

اليوم وأنا منسوح يم الصوبة<sup>(1)</sup>.. ورأسي الذي كثر الشيب فيه قبل  
أوانه، يتوسد مخدة ريش، ومتلفلف بعبائتي الهربد كأبي سلطان بدوي،  
سألت معذبتني وأنا أنظر الى بلعومها الذي يلالي منه الماء الزلال:  
لم - من دون نساء الأرض - لا تظهر على محياك العلامات السبع  
للتقدم في السن؟

فأجابت ويدها اليمنى تعبت في گوذلي:

- الناس تكبئهم (تكبرهم) الأخبان (الاخبار) مانت (مالت) التلفزيون (التلفزيون) والبنامج (البرامج) السياسي الحوانيه (الحوارية)، هاي آني (اللي) مدني (مدري) شعاجبكم بيها؟
- ليش أنت ما تشوفين أخبار؟
- أشوف أخبان، بس مانت (مالت) الطقس، مانت النياضة (الرياضة)، تفجينات (تفجيرات) وإعتصامات وداعشيات، ناء (لاء)، تعذني (تعذني)، تسوي عندي تجاعيد، وتقصف أطناف (اطراف) الشعر!
- وهاي هي بس طقس ورياضة؟

(1) المدفأة النفطية

- أني بننامجي (برنامجي) المفضلن (المفضلن) هو «ذا دكتورز»،  
وأحب أوبنا وينفني (أوبرا وينفري)، وأحب أفلام أحمد حنمي  
(حلمي)، يقرقشني، وأحب الفلم (الفلم) مالت السهنة (السهرة)  
اللي ب «تي في فايف»، كونش أحب الافنام (الافلام) الفنسية  
(الفرنسية)، تعجبني كونش (كولش) إيزابيل أديجاني..وكاتنين  
(كاترين) دي نوف، وكونش أحترم جينان ديانديو (جيرارد  
ديبارديو)!

- زين ما تابعين مقدمة البرامج العراقية الشهيرة (ه.ح)، خوش  
عدها برنامج هالايام عن الفقراء؟

- بس لا هاي اللي تصبغ أشقن وتخلي ونده شعرها عبالك أحنا  
بمسنسن مكسيكي!

- هاي يموتون عليها ربعنا!

- هههههههم نبعكم. أخ منك يا لساني، المهم صنوحتي، انت  
نازم (لازم) تعيد تتيب (ترتيب) ذائقتك التنفيزونية والصوتية  
عموما، حتى نا (لا) تنهق (ترهق) خلاياك، بشغلات (بشغلات)  
تخني عمر الخلايا أقصن (اقصر)..

- أنا أخو المحافظ.. هاي شنو إنوب؟

## سهرة رأس السنة

أحيت لي السيدة أم حسام حفلة رأس السنة.. وهي متللفة معي في فروتني الجوكليتية، وأنا أكسر لها الجوز الاربيلي، والقمها إياه، وهي تغني كاسيت أليسا كاملا، وأنا أدوزن الها اللحن بالخشوكة، ومعجانة الرمان المفرط والمملح بقربنا، والصوبة تنفثُ الدفء في أرجاء الهول:

« وإن كان دامش حب ثوني.. انت دا بيثى إيه، وما تعنفش نيه »

وضحكة أم حسام تجلجل البيت بأكمله، وشمعة واحده تضيء المكان، بانتظار أن تنفخها سوية بالطنخش ضبط.. عامكم سعيد وبريين الذمة!

## منخفض جوي

داخله بالانذار أم حسام اليوم.. سامعة بالاخبار ”لح يسير منخفض جوي سايبيري، وح تنخفض تراجت (درجات) الحنانه (الحرارة) دون الصفن (الصفير) المثوي، وح يموتنة البند (البرد)“!  
 گلتلها: يعني مجبلين اعله (چويريد) لو اعله (الازرگ) لو اعله (العجوز)؟

گالتلي: چنو هاي حياتي، نساتل!؟

البيت كله مفروش اليوم، وكل البيان مغلّقه، والصوبات بكافة انواعها مشعولة وجايه يمكن نص طن كستناء، ومخلية قوري چاي، ودلة گهوه، وقوري زغير غريب!

نشدتها شنوبه هذا؟ ككو؟

گالت:

- هذا زنجبيل بالقرفة!
- زنجبيل شنو؟
- صنوحتي، هذا كولش كولش يفيدك..
- وأنا شمالي ويفيدني؟
- م بيك شي حياتم، عدنان القيسي أنت!
- أي عبالي! [أنه ترة عصبي كولش]



## مرفت وكمال

أم حسام تحب الافلام المصرية القديمة (أوي..أوي) وتحفظ حوارات بعضها كاملة.. ويحلوا لها في أحيان كثيرة أن تسترسل في الحديث معي بالمصري مستعيرة بعض مشاهد تلك الافلام..

”وأنا بسني الحمام

طارت حمامة مني

وحطت غصب عني

فوق سطوح الكيران..”

أم حسام تغنيها في المطبخ، بثوبها السنن المشمشي - هو الآخر - وأنا أتهدى على بايات الدرج، نزولا للبيضتين العيون بزيت الزيتون البكر، وظفيرة الجبن، وحببيبات الزيتون الاخضر السلفيتي!  
وقفت بباب المطبخ، أتفرج على هذا الكيان اللورباكي الحلقومي القمرديني..

إلتفت فجأة، فرأتني وقالت متفاجأة:

- كمال!

- مرفت!

- فاگتني، إنت من زمان وائف هنا؟

- من لما الحمامه طارت!

- يا خراشي!

- أموعن!

## أول يوم رمضان؟

- أوعى يا خوية كدة ما تلمسنيش!
- ليه ياست الستات، هو إحنا بيينة نُجك؟
- لا يا خوية، بس النهارده أول رمضان ولسه فاضل على مدفع الافطار إشي وشويات
- رمضان إيه يا أم رمضان، بكره أول يوم، مش النهارده، تعالي هنا..
- لئه يا خوية، ساينة عليك النبي.. بلاش!
- اللهم صلي وسلم عليك يا نبي..
- گتتي بتلبش لما إتترب مني..
- لا حول ولا ثوة الا بالله...
- هو انت ليه مش صايم النهارده، مش كدة حرام!
- لسه ما شوفناش الهلال يا ولية، الله!
- يا خويه، الناس طلعت للثمر زات نفسو، وإن تو لسه مش ئادرين تشوفوه؟
- وإنت ليه ما طلعتش معاهم يا ئسطه انت يا غسل؟
- يا راگل، إئي الله، بئولك گتتي بتلبش، إبعد خالص، متأربليش، وبعدين الود حسام ئاعد يئرا قرآن في التوضه بتاعتو، حيئول

عليه أيه؟

- ما يثول اللي يثولو، ده حني بشرع ربونا، الله!
- يخى گك كسر حُكك، إختشي شوية، بلاش من الواد حسام، إختشي من ربونا
- يا وليه بئولك النهاردة مش رمضان، إلا إذا كنت صايمة كدة تسايج..
- إنت متبطلش الالفاز الصعيدي دي، تسايج أيه، يابو تسايج، أمة لا إله الا الله كولها صايمة النهاردة، وتؤلي لسه مشفناش الهلال؟ إنتو ليه متبطلوش الحكاياه دي، اللي بتعملوها كل سنة، دايمًا الدنيا كلها، بكوم وإنت وگماعتك بكوم!
- إحنا بنفهم بالفلك، يا ستو هانم!
- حابس.. حابس، تكونش فاهم يا خوية أنكو بس اللي بتفهموا بالفلك؟ دي العيال بتوع الگامعة بيفهموا فيه أحسن منكو..
- خلية من السيرة دي وحياة أبوكي، أيه حكاية الواد حسام؟
- يا خوية الواد راگع من لندن بدئن وسبحة، وكل ما خوش عليه الاوضة ألائيه يا بيصلي، يا بيثرا قرآن!
- إنت متأكدة إنو كان في لندن؟
- أمال كان في تورا بورا يعني؟
- مالك بتكلميني كدة ياولية زي ما تكوني بتكلمي عدوك؟
- يثطعني، هو إنت زعلت يا باشا، ثطع لساني، ثطع لسان اللي يزعلك يا باشا، بس إنت عارف يا بشبوشتي إن الصيام صعب السنه دي، خوش خودلك شور كده ونعنش، وأنا ح عملك

كوباية لمون تروء دمك..

- أنا راىء، راىء، راىء.. يا ختي!

- شكلك متعصب كده يا بشبوشتي، طب و حياة النبي إحنا بندوب

في اللي خلفوك، ومنتدرش على بعدك خالص، كولها ساعتين

تلاتة، وبعديها ح ندلعك آخر دلع ونروثك آخر روثنان!

- إمممم..

- متممش، دة حتى بالامارة الواد حسام غايب حاكات كده من

لندن، بيؤلك تعمل هوايل..

- ومالو.. إحنا بتوع الليل وآخرو.. بردو!

- هيه هيه، تسلملي يا سبعي

- إبني كهزي الشيشة، والحاكات والمحتكات

- من نن عيني، ياروح ثلبي انت

- وصيقي شوية و حياة أبوك، عشان بتشائم من اللبس المخنوء ده!

- ميصحش يا باشا

- يصح يا بت!

- اللي تتول عليه يا سبعي!

## طرزان

- سي صالح، مش ح تصحى بثة؟
- صاحي وحياتك يا ست الستات..
- وأنا أثول النور ده گاه منين؟!
- د إنتِ النور كلو..
- متحرمش من لسانك اللي ينشط غسل ي خويه
- ملقاش عندك فنگال نهوه، والنبي؟
- طبعا تلائي، سانيه وحده وإعملهولك يا سبعي..
- نشربوع الفرندة لو سمحت؟
- على بال م تصلي المغرب، يكون مستنيك ع الفرندة
- م تحرمش منك يا ست أم حسام يا سُكرة
- ويخليك ليه ئادري كريم
- فاكرة لما كنا مخطوبين يا ست الستات
- هم هم، طبعا فاكراه، ودي حاگه بتتسي.. دي كانت ايام!
- وفاكرة الود حنفي، ابن خالتك، الود التخين ده الأهل، ده كان
- مطلع عيني، ربونا يسامحو؟
- ده ود خايب، وخيخه، يگي إيه گنبك، المنيل على عينو ده؟

- مره ثللي: إنت إيه اللي عاغبك بأبلة أم حسام؟
- أبلة بعينو.. المفصوص!
- ثولتلو- وربنا شاهد - أنا بديك....
- صادئ من غير أيمان يا بعلي!
- ثولتلوا أنا بديك اليوم اللي تلمنا بيه ولو عشة فوء السطوح، أنا وست الهوانم، الست الكُمَّل، صاحبة الطول الساحر، والشعر الباهر، والملفوفة القوام..
- يخراشي على زوئك، كمل يا خوية..كمل..
- ومن يومها يا أم حسام يختي، ندرت ندر: أصوم كل خميس، لحد ربونا ما ياخذ أمانتو، شكر وحمد على نعمة ضم حضرتك لأسرتي المتواضعة..
- يخيبك ي خوية، هو في حد ينّي الخميس عشان يصوم؟
- أصلنا بالصلاتوع النبي كل يوم خميس، بنگيب كيلو كباب وكفته، بنفطر من هنا، وننزل لوسط البلد من هنا، نتمشى شويتين، وناكل كُنافة بالسمن البلدي والگبنة، وندحك مع بعض، ونديها اتنين معسل تُفاح وعنب..
- الله انا بموت بالكُنافة بالگبنة ياسي صالح
- ونتنناراگعين نكمل السهرة في الشئة، ونغني لحد وش الفكر..
- كل ده بعد الفطور، ده إنت گامد أوي؟!
- أنا بشيل نبوبة الغاز بسناني، أو مال إيه، أنا كنت في السنوية بيسموني طرزان!
- أي هيّه؟

- أي والله، شايفه حضرتك، لما نتعد طول الليل نسمع الست نكأة، وإنت بريحي، ولابسة الفستان الشفتشي..إيووو، يا دين النبي يا كدعان!
- شفتشي إيه؟ إختشي يا راغل، أنا بتكسف!
- دحنا بنعمة ي ولدان، ربونا أدمها نعمة واحفزها من الزوال، ياااا رب!
- والنبي تعالي بريحي..
- أهووو
- عاوز أشوف ربونا خالئ العسل من إيه يا ولدان؟
- بتكسف يا عبدو!
- بموت في المهلبية ي گدعااااااااان!



## إرهاب عاطفي

الضغط العاطفي الذي تمارسه علي أم حسام أصبح لا يطاق!  
تحملت بما فيه الكفاية، وصبرت كثيرا وطويلا، على طبع ما عاد لي  
طاقة للإستمرار في المجاملة بتقبلها.

هناك الكثير من الناس يستسهلون التمادي اذا ما وجدوا من يتقبل  
منهم ضغوطاتهم. لكن هذا لا ينفع معي على الإطلاق!

فأنا لمن لا يعرفني رجل (محرِبٌ)<sup>(1)</sup>، ساطوري لا يفارق مضجعي،  
ومسدسي (الربع وبلي)<sup>(2)</sup> في محزمي دوما، وأبدا!

المجاملة في الامور العاطفية لا تجدي نفعا، لأنها في النهاية ستتكشف  
على الحقيقة المرة التي لا مجال لإنكارها.

أنا في الفترة الاخيرة يمارس ضدي من قبل هذه الكاشانية - الطرية  
العود والمخسوفة الحشا - إرهاب عاطفي قل نظيره.

فكلما دخلت عليها - خاصة في الفترة الأخيرة - أمطرتني بوابل من  
الكلمات التي لا أعرف كيف أصفها، لكنها ومن دون شك أكبر من قدرتي  
التحملية، ولكي تكونوا في الفورمة، سأضرب لكم أمثلة من كلماتها غير

(1) من الحرب وتعني المستعد للحرب

(2) أصغر حجم من مسدس أبو البكرة

المعقولة التي تطلقها كلما رأنتي:

- هلا بضوة البيت، هلا بضوة روعي، هلا بروح روعي!!
- يمة هلا بصلوح من جانه، كُفار وغمس إعشاننا!!
- هلا بحشاشة كلبتي، هلا بيتوت دلالي!!
- هلا بماي عيوني، هلا بضوه عيوني، هلا بكحل عيني!!
- اروح فدوه لطولك (١٧٦ سم) أروح فدوة لتراب رجلك (٤٣)
- يمه فدوه لله ولعطيته، فريخ ويسوگ بمطيته!!!

فتأمل

## كاشان

كلش مرتاحة اليوم أم حسام.. وعدها سالفه كل شوية تسولفها  
وتضحك..

طبعا أم حسام كائن حي عصفوري الشكل لا يمكن تخمين عمرها  
نهائيا، تحافظ على نظام غذائي صارم، وتمارس الرياضة باستمرار..

البارحة، جارتنا الجديدة خطبت أم حسام لإبنها!

وعمت عيني كل شوي تعيد السالفه وتضحك، وتدمع عيونها من  
نشوة الفرح.. وهي تستذكر المشهد:

«تگوتی إنتی بعدج بالکنیه لو تخنجتی .. خبنتنی، إحتاریت شگوننها؟»  
یمه فدوة..

## رطوبة

گاعد گبال المبردة الجديدة البرفات اللي هي تقليد البرفاب<sup>(١)</sup> يعني  
شلون قبل أكو ناشيونال، وانترنتشيونال، هسة الايرانيين صاروا بروسنه  
أهل ماركات، إحنا أهل (الهلال والرافدين)<sup>(٢)</sup> وباچه الحاتي..

أم حسام ما تقبل تجي تگعد يمي گبالها، أگللها:

- يا ماي عيني تعالي؟

تگول:

- نا.. نا.. (لا.. لا)

أگللها:

- يا شيببي چنھا هوا شلال گلي علي بيگ<sup>(٣)</sup>!

تگول:

- نا.. بيھا نطوبا!! (رطوبة) عبالک گاعدين بالتنوما!! بالشرجيا!!

وآني ما أحب الرطوبا!!

(1) ماركة إيرانية شهيرة لمكيفات الهواء التي تبرد الهواء بواسطة الماء وتستهلك القليل من الكهرباء.

(2) ماركات عراقية لمكيفات الهواء

(3) شلال ماء شهير يقع في شمال العراق

هاي بالله شتسويلهاااا، أجرهااا من شعرهاااا، أروح فدوه لحلگهااا  
اللي چنه فم السمكاااا  
حبوبي..؟!!

## ذاكرة أم حسام

فريق بحث أمريكي في معهد "غلاستون"، وبقيادة أستاذ علم الأعصاب وعلم وظائف الأعضاء في جامعة كاليفورنيا ستيف فينكباينر، إكتشف أن أحد البروتينات الموجودة في الدماغ، والمسمى بروتين Arc والذي يقوم بدور محوري في عملية الاحتفاظ بالذاكرة طويلة الأمد.

وبحسب البروفيسور فينكباينر فإن الأشخاص الذين يفقدون لهذا البروتين يعانون من مشاكل تتعلق بالذاكرة، أما مرضى الزهايمر فان البروتين هذا ينضب في مراكز الذاكرة في أدمغتهم.

وفي التجارب على الفئران - أجلكم الله - أكتشف الباحثون أن الفأرة التي تفتقد الى هذا البروتين تستطيع أن تتعلم أشياء جديدة، لكنها تفشل في تذكرها في اليوم التالي!

الكثير من البشر - ولا أقول العراقيين - يتعلمون أشياء ما يلبثوا أن ينسوها في اليوم التالي، وتمر بهم الهزائم والانتصارات دون أن يتعضوا، لا من هذه ولا من تلك.

خذوا مثلاً (ضلعي) أم حسام، جلبت لها قبل حوالي (ثلث طعش) سنه أفرط ذهبية كلفتني وقتها حوالي (ست، سبع، ثمن، تسع) أوراق! اليوم، ومن الصباحيات، طلبت أن أجلب لها سلسلة ذهب "على

ذوقك“ دون أن أنسى أن أجلب معها «فد قرءان زغير، خو مو تجيبها بطرگها»، وتذكرني:

«ترة من تزوجنا لسة، ما طبيت عليه بقطعة ذهب هالگدوتها!»  
ذهبت سدى أقراط الذهب تلك، وذهب الألف دولار ثمنها بالشط..  
من لي بالبروفيسور فينكباينر ليحقن دماغ مليكتي ببعض من بروتين ال  
!Arc

ولن أكلفه - لو فعلها - بحقن جارنا أبو عروبة، الذي قلب علينا الدنيا  
في العهد البائد، وهو يتقدم الحشود الزاحفة الى مقر مدير الناحية، مرددا  
الارجوزة الدارجة حينذاك:

«على عناد بوش وفهد، صدام باقي للأبد!»

..والأن أسمع في كل مساء يتحدث مع جلاسة في باب الدار - بعد  
أن كنى نفسه بأبي سجاد - عن فضائل الحكومة، ويرفع صوته حين  
يراني، هاتفاً:

«نعتن الله اعله أمه وأبوه المايحب الحجي!»

## إغ وخن

اليوم حلت علينا ضيفة عزيزة، والدة أم حسام!

تلغيتها بالباب، أهلي وأمرحب:

هلا ومية هلا.. مليون هلا، حمد الله ع السلامه.. دحنا زارنا النبي..

هلا بعمتي..

- لتضوجني صوصاتي.. صيخني جُلناغ.. بعدين شنو هاي الزولية

الحمغه (الحمرة) واصلة لغاس (لراس) الشاغع (الشارع)! شنو

عدكم حفلة أوسكاغ (اوسكار)؟!!

- أحنا فرحتنا ما تنوصف (جوجاتي)! أبو علي تعال هنا أذبح

الطلي بالباب..

- شنو هاي، عغوس (عروس) آني خومو عغوس!

- أحلى عغوس.. وروح مزعل!.. أبو علي انطينا بس المعلاگ

وأخذ الطلي لجهالك..

طبعا عمتي لابسة كلة بنفسجي، بس أيشارب زغير على رگبتها المرمر

لونه أخضر حشيشي، العطر ما عرفته شنو، بس وصل لعمار ابو المولدة،



اللي من بعيد صاح بطريقته البروليتارية الرثة: خالي.. خو ما محتاجين شي؟

(ما جاويت ولبسته..)

أم حسام صار ساعتين وربع بالحمام، وكلما دگيت عليها الباب، تگلي: هاي شبيك مستعجن، غين ماما جاية واحد ينتب (يرتب) حانه (حاله)!

المهم، خلصناها اليوم، إغ وخن!  
سألت جلنار عمتي الراقية الكيوت: جوجاتي انت شنو هذا العطر المخلية؟

- صوصاتي عيني، آني غيغ (غير) دوتشي أند گابانا ما استعمل، وما أشترتي منا من العفاق (العراق) لان كوله مغشوش!
- يا أهلا وسهلا ومرحبا، زاغتنا البغكه!
- هههههههاي هاي انت شگد مكغوه صوصاتي، تقلد لك؟!
- ليلتنا عنب يا باشا!
- هههههههههههههههاي

## چاي العصر

جلنار.. من يوم الاجتنا ولحد اليوم وتقاليد البيت أنكلبت گلاب،  
 وصارت من العادات الجديده - القديمه: چاي العصر!  
 يحطنلهن كراسي وطبلات بالحديقه، وأم حسام تلبس بيجامتها الستن  
 المشمشي، وجولنار تلبس بيجامتها الستن الكرزي، والتسريحات مال  
 خاتونات، والعطورات اللهم صلي ع النبي، وينصبن النوار گيل الملكيه،  
 وريحة المعسل الفاخر تمللي البيت، وقريب الغروب، تبدي جلنار خاتون  
 تغني:

تحن مثل العطش للماي  
 تحن ويفدها المكايغ  
 ويطويها  
 وإننت ولا يجي بيالك  
 تمغ مغه  
 غغب بيها..

وأم حسام تنفعل وياها: اناه (الله) عليچ اناه، صوطچ يجنن ماماتي!  
 صوت رخيم فعلا وعجيب، صدگ عايله محترمة..

بس يمكن منا وغاد يرادلي بيجاما ستن فختلي، والعصرية أگعد  
بنصهن، وأشبع چاي وكعك ونوارگيل وعطور، واستمع لهذا الصوت  
الملائكي، خو مو آگابل مفيد عباس<sup>(1)</sup>، يظل يمرد بچلاويي: گال  
البولنگ.. وحجى التنس.. وطلعوا بيت فاروق چنچون دايرين عليه  
ومسوين جلده بالطو!

---

(1) صديقي المقرب

## هوم سيك

آنة وأم حسام نحب نفس الأشياء، ونكره نفس الأشياءات، ونحلم بأحلام مشتركة نوعا ما.

من ضمن أحلامنا انو ييلطون شارعنا، آنة وأم حسام كولش نحب التبليط، ونحلم ببلد مبلط من الفاو حتى سيطرة كركوك أربيل..  
منطقته تأسست سنة ١٩٩٢، وصار عشرين سنه يلا وصلتنا المجاري دون أن تربط بالبيوت..

يمكن بالعشرين سنه القادمة يوصلنا التبليط؟ آنة (كليش) أعاني من الطسات، اللي تخربط أكبر صدر سياره، وتگوم أفضل دبلات، وأم حسام (كولش) تضوج من التربان اللي جاي توسخ حذاءها الـ (چارلز جوردان) اللي دزه الها أخوها رمزي - شوفوا إسم أخوها إشلون ينگرط غرط - ومن تطلع لراس الشارع (تاخوذ) تاكسي..

حقيقة البلد تعبان، ويبدو أنه راح يبقى تعبان..مرات إنضوج آنة وأم حسام بالليل، نريدنه مكان نطلع نتمشى بيه، حديقه نشم بيها هوا ونمارس رياضة المشي، كوفي شوب مال أوادم نكعد نتغازل بيه ونطخطن بعض كما كنا في الـ إيرلي دايز..

ماكو حياة بهالبلد، مرات أفكر آخذها للعيتين، ونشوفلنه دولة -

حتى لو السويد - نروح نعيش بيها، ونشبع أوكسجين وبيتزا وقيفالدي  
وتطخطخ.

بس أخشى من الـ (هوم سيك) ، وأنه منا القولونج مالتى (منگد)،  
فأخاف لا أموتن وهلى ما يدرون بيه.. على بوية!

## جمعة مباركة

أكو هواية ناس ما يحبون جملة «جمعة مباركة»!  
 أنا أعذرهم.. لأن من يفتح عيونته، ما يلغي وجه كأنه وجه ملاك، يقول  
 له: جمعة مباركة!

ولا من ينزل من غرفته يشم رائحة البخور والعطور تنطير في أرجاء  
 البيت.

ولا من يطب المطبخ يشوف صحون غيمر العرب والعسل (بشهاد  
 الملكة) والصمون الحار الدبل المسمم. ولا من يخلص ريوغ تجيه  
 دلة الكهوة والفنجان چنه حلا شيحة! <sup>(1)</sup>

وكل مغثة ماكو.. وصوت فيروز يملي المكان.. والتلفزيون  
 على ناشيونال جيوغرافيك يحچي عن السبب الجيني لرشاقة النساء  
 الاوكرانيات.

وكائن حي رقيق يدندن في المطبخ وهو يجهز (إنكلش كيك وذ  
 إنكلش تي أن آيرش كب أوف ميلك أند كمون)!  
 جمعة مباركة لمن استطاع إليها سبيلا أيها المساكين!

(1) ممثلة مصرية حسناء

## لدينا فرع آخر

أبد ما أحب أكون جزء من مشكلة دولية أو قومية أو وطنية، ولذلك أنا لست مع زواج القاصرات، هذا الزواج المنتشر بقوة في المجتمع العراقي الملتهي بالموت عن كل مشاكله وأمراضه.

اليوم وزير التخطيط يگول العراق يحتل المراتب الاولى في زواج القاصرات، اللي يشكل حوالي ١١٪ من الزواجات في كل عام! أنا لا أميل للقاصرات كثيرا، أحب الارامل، وحظي مع الارامل كان كاعداً جداً، فأم حسام قارورة العسل مع شهد الملكة، هي مثال للارامل المسنعات، اللواتي يهتز لهن خافقي، لخبرتهن، وللحزن الذي يتركه فقد الاحباب في عيونهن الواسعة.

لا أتذكر أن أم حسام ومنذ زواجي الميمون بها في تلك الصباحية المباركة التي هربنا بها مع «الضيء الاول» الى المنصور ميليا - قد ذكرت سيرة المرحوم أبو حسام أمامي.

تراعي شعوري ورجولتي جدا، وتحرص دوما على منحي إحساسا بأني الرجل الوحيد الذي يشغلها في هذه الحياة الفانية.

مسنة أم حسام، ومعتبرة، وشيخية، وتستهل واحد يعاملها على أنها الأنثى الوحيدة في هذا العالم، لكن جارتنا الارملة المغنجان الرقيقة

السمراء ذات الشعر الفاحم والصوت المبهر مدري شبيها، جاي تخلي  
صورة أم حسام تهتز أمامي، وأنا رجل صريح، وأحجي مالت الله!  
ومالم، تنتقل أم عصام من منطقتنا، أو تمتنع عن زيارتنا، وجلب ما  
لذ وطاب من بقلادة وبرمة وقطب وساهون وحلاوة جزر، لان أهلها  
شكرجية، ويومية يدزولها وجبة حلويات بالفستق الحلبي والدهن الحر،  
و«أعرف أبو نايف كولش يحب الحلويات، وما الي لذة بيها الا ياكل منها  
قبلي»، فإن أم حسام ستبقى المرأة الأجمل في عيوني، والاكثر أناقة،  
والأطيب رائحة!

لكنها طبعا ليست الوحيدة مع الأسف، فقد تم افتتاح فرع آخر منها  
ونحن في غفلة من أمرنا!



## شرقية الملامح

- ها أحسن لك هيج؟ طار من عندك يوم صيام، من ورا العناد، مو  
گتلك الناس الله هاديها السنة، وصايمه سوا..
- بس ما أعتقد نعيّد سوا؟!
- گول: يا الله؟
- يا الله..
- شنو البارحه الكهرباء نعمة من الله، گعدت بالعشره، لگيت  
لشتي<sup>(1)</sup> جامده من المكيف، شگد أحب البروده لخاطر النبي..
- وزير الكهرباء يگول سنة اللوخ الكهرباء بعد ما تنگطع، وتنسون  
شي إسمه مولده وجوزة!
- كل سنة يگول هيج دادة، ونخلصها ضميم وظليم وتالي، هم ياخذ  
مالاته، ويروح يشتريه نادي رياضي لو عقارات بلندن، وطيّاره  
خاصة، ومرة جديدة، والتقاعد مالته ماشي.. أگلك أبو الشباب؟
- البارحه باشا، اليوم أبو الشباب، شنو سالفتهج هالايام؟ گولي.؟
- إنت هم ناوي تاخذلك مرة جديدة علينا؟

---

(1) جسمي

- أنا؟!؟
- إي أبو أنا، مرتين ثلاثة أشوفك تبصص لأم عصام، بنظرات أبد مو بريئة..
- هههه لا والله ماكو شي، هههه بعدين أنا وين بي حيل زواج ثالث، وقابل شنو نطلگ المرة من رجلها، وتزوجها..
- هو هذا حچيك اللي يخوفني، تسوي روحك ما تعرف بيها أرملة؟
- أنا أخو زناد، والله ولا أدري!
- لا تحلف بـ الله، مو إنت صايم مولانا
- حرام بالحرم ما أدري أرملة، يعني هي أرملة؟
- أي أرمله، إتزوجها؟؟؟ حتى نصير جمعية أرامل بلا حدود!
- لا يابا، إنت صدگ تحچين، أنا بعد ما تزوجتچ، طابت نفسي من النسوان!
- طابت نفسك!! لعد شلون مسميها «شرقية الملامح»؟!؟
- أنا مسميها؟
- إي إنت مسميها، أبو النسوان، وهي گالتلي ذاك اليوم بالقراية، وگايللها «سمارج البصراوي تارك حسرة بگلبي»!
- أنا؟!؟
- أي إنت، جاي تمهدلي هي، حتى لا أنصدم فجأة، من تخطبها، وهم تزرگون من الفجر للمنصور ميليا مثل ما سویت وي غيرها، ومحد يدري بيكم، إنت وقاطك الکریمی..
- لا يابا لا، يعني أي وحده أجاملها بكلمتين حلوات معناها راح أتزوجها، شلون يشيلها عقلچ؟

- والله إنت! آخ منك يا لساني.. بس والنبى محمد، إذا تزوجت
- عليه، أذب برمىل النفط كوله عليه، وأطگ روجى بعود شخاط!
- صايره تحچين «أطگ»!
- غير من ورا الگرگه مالت " شرقية الملامح " أم دم الحار؟!
- أم دم الحار شنو؟
- ما تتذكر؟
- شتذكر؟
- طبعاً، من گد الچذب، تسولف وتنسى، مو إنت گاييلها أنتم
- «السمر دمكم حار»؟
- وهي گاييلتلك «لا تگول هيچ حبوبى، أستحي»!
- آنا؟!
- إي إنت!
- حرام بالحرم، ما گاييل!
- لعد هي تألف من يمها، وبعدين ٢٤ ساعه بس تمدح بيك گدامى،
- وتتغزل بيك، وبلسانك الحلو.. «حبوبى»!
- خطية، هي تحب تجامل، ولسانها حلو، لا تخلينها بالچ، شنو
- حسام أشو ماكو؟
- طلع، راح للجامع
- والله خايف على هالولد من روحة الجامع هاي!
- شدعوة.. أبوية إنت، بيت الله هذا!
- هو إنت تدرين شجاي يصير بالجوامع..!
- أگولك حبيبى؟

- عيوني الج
- فد سؤال عندي؟
- تفضلي؟
- بس تجاوبني بصراحة؟
- أنا أبو الصراحة
- إي ميين
- شلون تگولين؟
- لا ماكوشي، بس ردت أسألك؟
- سألني؟
- عود ليش مسميها «شرقية الملامح»؟!
- أهووووووو..!!

## تبدیل أرقام السيارة

طبعاً ما كُنتلكم البارحة اكتملت العملية الشاقه والطويله لتبدیل أرقام سيارتي من اللوحات السود (المنفيست) الى اللوحات البيض (الالمانية)، وتسجيل السيارة بإسمي وبسنوية جديدة وزغيرة و(عظم عاج).

هاي الرحلة بدت من شهر الرابع بالمرور، أنوب بگمرگ كربلا، أنوب بگمرگ أبو غريب الرهيب، أنوب لمرور كربلاء في رحلة من يوم الاحد الفات لغاية البارحة الخميس.

رجعت الظهر فرحان بالارقام الجديديات والسنوية، ومن كد فرحتي، كل شويه أطلع اباوع عالارقام وارجع، وأسمع أم حسام تشتغل بالمطبخ وتغني:

«جتالي موش بعيد وبذني البيوت» ..

وأنا مغلّس چني .. ما أسمعها.

طلعت انوب اشوف البراغي مال الارقام، بس لا واحد من الجهال لعب بيهن لو كسر الغلاف الابيض البلاستيكي مالتهن، وطبعاً من رجعت، هم غنت أم حسام:

«راحوالغير أحباب حبههم طلع جذاب.. وهم النسونا شلون ننساهم!»  
طبعا أم حسام، صايره براسي شادية، وجاي تذب بسامير، عبالها أنا  
أطلع أشوف سيارة أم عصام - الهونداي توسان ٢٠١٣ دبل سي دي، دبل  
اير باگ، كراسي كهربائية، قمارة بانوراما، كشنات جلد، سبير ما نازل،  
جام عازل، يدات كروم، كاميرا خلفية، تبريد ثلج - اللي من الصبح..  
ماكو!

شلون عرفتها عدها هيچ ظنون؟ من رجعت من تحبيك البراغي مال  
الارقام مالت سيارتي - البي ام دبليو ١٩٨٩ لون ازرق، جلد مخمل  
نظيف، البنيد جارد، والتبريد عاطل، الكير بيه دفرة بالنهضة، والمحرك  
بيه خيظ تبخير، والجمامات الخلفيه ماتنزل، والمسجل عاطل، والراديو  
يوشوش، لكيتها تغني:

«معزومين

وجرح البيئة

بزيونة يم بيت جينا

لو ترجع مدري تبات

بييت جدها بالعرصات».

طبعا شگد أحب أم حسام، بس حيل أضوج من تشمر الحچي! هسة  
أنا أن راحت لبيت أختها جينا، لو باتت بييت جدها، يا هو مالتي؟ زلمه  
صايم وأريد اليوم أقره مفاتيح الجنان من الجلد للجلد.. وأبچي..

## حجية كشخة

اليوم اول مره أشوف حجّيه تقيّه، كتلة من عطر العود الفاخر، كشخة،  
العبايه يمكن حرير، والشيلة<sup>(1)</sup> بريسّم، والوجه يلمع، وأحمر، وينفط دم!  
مرت من يمي، وأنا واكف المغرب، أرشرش بالشارع، اللي يوميه  
حافريه، طبعا حكومة كربلا، من غد ما دفانه، بس يحفرون بالشوارع!  
سلمت عليه، وشلون سلام مال حجيات، شيخيات، مالات الأول:  
الله بالخير خوية!

- مليون هلا بالحجّية، أهلا، وسهلا، وكثير مرحبا..

أموت على حجّية تقيّة، أحب الحجيات الكشخه، المعترات،  
والحافظات الشعر، والتاريخ، والاصول.

طبعا الحجّية عمرها بالخمسة وستين، وتكلي: خوية، ولا بسه شحاطة  
سودة زوغان بيها علامة شانيل، روحها خضرة، الحجّية، رغم هي (هم)  
أرملة صار أربع سنوات!!

يسولفن عنها النسوان، يگولن من تتذكر رجلها أبو رشدي، تگول  
أروح فدوة لترات رجليه، وتترحم له وللطن الجابته، وتجر حصره طويلة،  
وتخنكها العبره.. عمت عيني عليج حجّية، حيل مغزره بيح العشرة، مو

(1) الشيلة أو الفوطة بلهجة بغداد، وهي غطاء الرأس العراقي النسائي التقليدي

مثل نسوان هالوكت.

مدري منين تجيب دهن العود هذا الخفيف، ريحته ترد الروح، چنة ريحة ورگ الشجر من يتبلل..

من رجعت للمطبخ، سألتني (أهلي):

- هاي حجيه تقيه السلمت عليك؟

- شمدریچ؟

- ميينة.. أولا ريحة العود وصلت للبيت كله، وثانيا ردت تزوع

روحك من سلمت عليك.. «أهلا وسهلا وكثير المرحبا»!

- غير جيرانة، ورد السلام واجب!

- جيرانة.. لو أم جيرانة؟ والله مسبل روحك، للرايح وللجاي،

شلون ما أشوف، حجيه تقيه راح تصير عمتهك!

- لا يابة، ماكو هيچ شي..

- لا يابة.. صنوحتي! سالفتهك وي أم عصام گاموا يسولفوها

بالقرايات.. راح تجلطني!

- لا حبييتي، حياتي، كلها إشاعات..

- لا تگيسني نهائياً، روح إلزم مفاتيح الجنان وإبجي، أبو إدميعة!

- لا حول ولا قوة..



## الليلة عيد..

إجيت تعبان اليوم من الدوام، طبيت للمطبخ لگيت أم حسام تغني  
وي الراديون:

”الليلة عيد.. ع الدنيا سعيد“..

وطبعا استوها طالعة من الحمام، والشعر مصبوغ (بني ذهبي) مع  
خصلات مدري شنو لونها، والكحل والمسكاراة مسوية أجواء مو طبيعية  
لوجهها، والبيجامة الستن النيللي الفاخرة بورود صغيره ذهبية، وحزام  
ستن ذهبي يحيط الخصر الملكي، ربما لكي تخبرني بأن تمارين البطن  
في الشهر الاخير، قد أتت أكلها.

فعلا.. البطن صايره، مسح.. حسب مصطلحات خالتي كواغد!  
سلمت عليها.. فتلقنتني مفر فحة، وحظنتني بشوق، حتى لگأنني چنت  
أسير بإيران!

نعومة الستن وطراوة القد المياس، ورائحة اللانكوم الخفيفة إختلطت  
علي أنا المتعود - طيلة عمري - على روائح: التچيم<sup>(1)</sup> والگعبية<sup>(2)</sup>... ما  
طولها عليكم، ذاهت روحي!

(1) التچيم هو اشعال النار في التنور الطين استعداد لشوي الخبز

(2) نبات مائي أخضر موجود في أهوار جنوب العراق

وهسة أنا متمدد بالفراش، وأم حسام بجاني، تلقمني الجوز واللوز  
والعسل، مو خوش عيد هذا!

## بيتزا

أم حسام.. مسويتلنة بيتزا اليوم، وخابرتني گالتلي: چيب وياك كوكا  
كولا!

جبت كارتونتين وإجيت، لگيت مجهزة العجينة مالت البيتزا، ومجھزة  
الفرن على درجة مدري شگد بحسب تعليمات قناة فتافيت!  
بس مع الأسف الحلو ما يكملش.. طلع (فطر) ما عدنة وانا كلش  
أحب الفطر..

وبما انو الدكاكين معزلة، أضطريت حسب تعليمات أم حسام  
بالذهاب لبيت أم كرار جيرانه، بلکي عدهم فطر؟  
قبل لا أطلع، وصتني أم حسام:

شوف اذا عدهم جبن قشعوان هم جيب وياك..  
وها ترة.. فلفل أخضر ماكو..

وإذا تحب زيتون شرايح جيب..

وأم كرار خوش عدها صلصة..

بس أهم شي..

لا تنسى الملح!

## "يا مسعدة وبيتج على الشط"<sup>(١)</sup>

ولو أنا عندي أم حسام تسوة نسوان آسيا وشمال أفريقيا وهايتي، بس حقيقة حسدت هذا السعودي اللي شارطة عليه خطيبته أن يتزوج وبها صديقاتها الثلاثة، المدرسات بنفس مدرستها، لو ماكو، ماكو!  
الأخ أبو سعود عود هو (ريمنگتون ستيل)<sup>(٢)</sup>، گام يتعزز، وما قبل.. بس عمامه ضغطوا عليه، وقنعه خطية..

وعقد عليهن - عمت عيني - كلهن بساعة وحده يم نفس (المأذون الشرعي)!

(البنات) الله خير.. صاحبات رواتب، شنو سون؟

أجرلهن كلمن شقة بنفس العمارة، ومن تجي ليلة وحده منهن، يجتمعن بشقتها ويتعاونن بالطبخ والتنظيف وبقية الالتزامات العائلية!

(ريمنگتون) صاير «يا مسعدة وبيتج على الشط» مسواجة<sup>(٣)</sup> بيده ويفتر

(1) مثل عراقي

(2) مسلسل امريكي شهير في الثمانينات بطولة بيرس بروسنان

(3) المسواك

على شقق الحديثات<sup>(١)</sup>، والحديثات عدهن إكتفاء ذاتي، وهن يدفعن  
ايجارات شققهن، ولا: «جيب لحم ما بيه قطره شحم، ولا إستنگي  
الطماطات وحده وحده، ولا جييلي وياك بطل زيب عندي فقر دم»!  
هذا الحظ من يگعد!

---

(1) الشابات

## جين مضاد للاكتئاب

العلماء الاميركان إكتشفوا أن السيدات البالغات الناضجات الجميلات المتغذرات المتفجرات يمتلكن جينا يسمى MAOA، يعمل عمل العقاقير المضادة للاكتئاب، والمحسنة للمزاج. وهذا الجين موجود في DNA النساء من دون الرجال!

أميرة قلبي أم حسام يمكن عدها كمية من هذا الجين أكثر من كل النساء، فللهذه السيدة المعتبره قدره عجيبة على إسعاد كل من حولها، اليوم خميس، وأنا في كل خميس أحس متزوج امرأة جديدة، لا تحمل من زوجة الاسبوع الفائت سوى الاسم! إسمي منذ اليوم أصبح: ننوحتي!

وأميرتي منذ اليوم ستصبح أمي وحببتي في آن معا، وعقد الزواج الذي أبرمه بيننا السيد الله يذكره بالخير، لا ينفي - والكلام هنا لأميرتي - «أنا عاشقين قبل كل شيء، وصديقين حميمين، وبلا عشق ولا صداقة حميمة، لا جدوى من الزواج نهائيا»!

من فتره وأم حسام تحبني مصطلحات مثل (جدوى) و(الحيلولة) و(الرهاب من الوحدة) لأن صاير الكتب متفارگ إيديها، بالمطبخ أكو كتب وبالهلول أكو كتب، ويم الدرج اكو كتب، واستغرب ليش بغرفة النوم

مرة (نشدتها)<sup>(1)</sup> گالتي: شوف ننوحتي، أوبرا وينفري تگول غرفة النوم مملكة العشاق، م يسير واحد يخلي بيها تلفزيون ولا كتب ولا اي شي، يُفقد الغرفة رومنتيقيتها، ويستلب الدفء اللي لازم يشكل كينونتها، لانها لازم تكون كصومعة لتعبد العاشق للمعشوق!

اليوم حتى العطر اللانكوم متغير من ” لانكوم هايينوز سنسيز ” الى ” استي لودر وايت لينن ” بالنهار، و ” لانكوم ماجي نواغ ” بالليل وجايه عطر ” إيلي صعب ” مدري شسمة، شفته خطف ع الميز تواليت، يمكن هذا مال خميس الجاي.

السعادة امرأة، وكلمن يگللكم غير هالكلام، سمعوه ولا تصدگون!.

- ننوحتي؟

- عيون ننوحتي!

- تعال تغدي ماماتي.. صحتك كولش م عاجبتي هالايام!

- (اليوم الجو نحرگه.. وعلي بنيطالب) .. إجيت طلقة!

## حریم السلطان

صارلها یومین أم حسام تفتقر علی راسی، وکلما سولفت، وگالت:  
 أني هالأيام نكبتي خانیه (رقبتي خالية)!  
 الیوم سألتها:

- أكلج شبیها رگبتج، أخذج للطیب؟
- نا (لا) ما بیها شی؟
- لعد لیش تگولین خالية، توجعج یعنی؟
- نا، خانیه، یعنی ما بیها ذهب!
- أنا أخوزناد!! أنعللج أبو الذهب، هسه أروح للصایغ، بس گولي،  
 شنو تأمرین؟
- حنیم السلطان
- حریم السلطان شنو؟
- بس گنه للصایغ هو یعنقه (یعرفه)!
- لیست رسمی، وطلقه للصایغ، الیوم مستلم راتب، والجو أحرگه،  
 صدك جذب؟
- نزلت یم الصایغ، لگیته جامد من التبرید، ملاعین الصایغ والیشتغلون



بالحضرة<sup>(١)</sup>، مگضینها مرمر وتبرید!

- عمو بلکي تنطیني: حریم السلطان!

- صار عمو..

وچان یطلعلي زنجیل ضخیم وطویل وبنهایتہ مدریشنو.. تفرجت  
عليه، کلش عجیني، گتله وزنه..

- عمو هذا یصیر اثنین ملیون وثمانیة وستة وعشرین ألف دینار!

- أنا أخو ازناد، ماکو أزغر منه؟

- لا عمو، هو هذا وزن واحد!

دخت، شلون هاي؟

الراتب ثمنیة وأربع تالاف، یعنی یبقی علیه ملیونین واثنین وعشرین  
ألف دینار، هسه لو أگالي واحد شریف یداینني المبلغ، وأنطیه بالشهر  
أربع تالاف دینار، چان انحلت المشکلة وهذا الشهر ناکل: حَو، أمرنا لله!

---

(1) مرآة الائمة

## بديكيور

اليوم سألت أم حسام:

- أشو أنت ما تصير عندج فطور بچعوب رجليج<sup>(١)</sup>، ٢٤ ساعة

لونهن وردي، وعبالك لقم مالت حميد الشكرچي<sup>(٢)</sup>!

جاوبتني بلهجه ما عجبتي:

- فطووور..؟ شنو جاية من ورا الهوش<sup>(٣)</sup> أني؟

(أووو، هاي بس لا مسولفيلها عن هايشتنه الجانو رابطيها بشباچ

غرفتي، و(أبوي) حاطلها بنكة سقفيه!)

يا حچاية.. ردي لمجانچ!

---

(1) تشققات كعوب القدمين

(2) أشهر حلواني في كربلاء

(3) الابقار

## عبارة نسوان

كلما يجي الشتا وأبدي بتعزِيل المبردات - جعلها الله آخر التعزيلات -  
تجي أم حسام تفر روحها يم خشمي، وتقول:

- نيش متعب نوحك يا حبيبي يا حياتي، چان جبتنك عامل يعزنهم،  
مو حتى إيديك صارو خشنات هسة، وبعد شوية تگوم تصيح:  
«عصّروني دلكوني.. ظهني يوجعني»!

طبعا صار ساعتين أشتغل وهي تدري بيه، بس شنكول غير: عبارة  
نسوان!

- تسبح بوحدك، لو أجي أنيفنك ظهنيك؟  
أگلکم.. اليوم خميس؟؟!!

## حلويون..

- صنوحتي، چنوحتي، منوحتي، حياتي، طوايفي؟
- أمريني؟
- مشتية بقناوه (بقلاوة)
- صار!
- وبنمة (برمة)
- تدليلين!
- وزناية
- من عيوني!
- وشوية ساهون
- على خشمي!
- وحناوة جزر
- من هالشارب!
- وحناوة رملية
- خادم!
- وقطب

- على راسي!
- وعش العصفور
- بعيني!
- وزنود الست
- تأمرين أمر!
- وممكن لقمة القاضي
- صار.. تتدللين.. من عيوني.. على هالخشم.. خادم.. على راسي.. تأمرين.. من هالشارب.. راح أجيب حميد الشكرجي هو وصوانيه.. ومن عيوني.. وعلى خشمي..

## (السيستم) ماتي

تگول أم حسام سويتلك غدا فرّوجة مال عرب سلگ، تاكلها بوحدھا بدون خبز، وتشرب السوب مالتها، أحس عندك بداية إستبراد، وهاي الفروجه تلزم گلبك، وتبعد الاستبراد عنك!

إجت صينية الغدا بيها الفروجه، والسوب، وماعون چبير زلاطة، وأربع برتقالات كربلايات، وماعون تمر خستاوي وراشي، ونعناع ورشاد، وگلاص مدریشنويه!

ضربتھن كلھن، ومسحت بقية الراشي بأخر تمره من الفندوس، وتركت الگلاص مال المادیشنو، وگمت غسلت.

رجعت لگيت گلاص چاي خادر والخاصوگة ما تبين بيه، ویمه بالصينيه گلاص مي بارد - كلش احب المي البارد بالشتا - ووياهم گلاص المدریشنو!

شربت المي والچاي وتمددت شويه يم الصوبة، وتلفلت بفروتي الجوكليتية اللون، گعدني صوت عصفوري ركيك جدا: نيش ما تصعد فوگ؟

صعدت الدرج بتباطؤ لشدة نعاسي، وتمددت على فراشي، وتغطيت

بيطانيتين، واستسلمت للنعاس اللذيذ..

بس لاحظت گلاص المدریشنو محطوط بصينية صغيرة، على  
الكومدي اللي على يميني!

غطيت راسي ونمت، ما أشرب هذا الغلاص هالخميس لو الدنيا  
تنقلب، شنو إحنا كل خميس على هالقوانة، بعدين أنا شايل المرارة،  
وإحتمال هذا السائل البالغ الكثافة اللي بالغلاص يآثر على السستم ماتي!  
وعاد أنا كلشي ولا السستم ماتي.

## كي الملابس

مثلما تعتبر ربات البيوت مهمة غسل المواعين مهمة شاقة وعسيرة ومؤذية، أعتبر أنا مهمة كي الملابس مهمة شاقة جدا وعسيرة جدا ومؤذية جدا، وبصراحة لا يستطيع أكبر واحد بالدنيا- منو أكبر واحد؟ - أن يجبرني على كي الملابس، هذه المهمة لا تليق برجل مثلي، عيب.. والله عيب!

حين أستيقظ باكرا، وبعد الحمام الساخن، والحلاقة، تأتي مرحلة لطم الخدود بال ” أفتر شيف ”، أنا أعشق ال ” أولد سبايس ”، تأسرني الروائح الكلاسيكية القديمة، حتى أنني لا زلت أستخدم عطر ” سوفاج ” من ديور، وال ” أزارو ”، والعطر الالمانى الارقى: ” جيل ساندر ”، بعبوته السوداء المكعبة القديمة. أما الكولونيا ال ” ريف دور ”، وال ” بروت ” فلا أستطيع سواهن.. أنا رجل كلاسيكي جدا، ولا أحب كي الملابس، ولن أكوي الملابس قط ما حييت!

حين أفتح خزانة الملابس، وأجد القمصان النظيفة المكوية معلقة بترتيب، وبجانبهن صف من بناطيل القماش، أشعر أنني بروس بروسنان ذلك الممثل البريطاني الارستقراطي الاناقة والذوق والحركات.



أختار قميصاً فوشياً وبنطالاً فيلياً وبلوفرًا زيتونياً غامقاً، أرش  
(جهامتي) برذاذ الـ "سوفاج" الفاخر وأنزل للمطبخ لأجد (ماي عيني)  
وقد أبدعت في تنوعاتها الصباحية الريوجية.

تعودت أن أسأل (بعد طوايفي) عن ما تحتاجه قبل أن أذهب لعملي،  
ورغم أن أغلب إجاباتها تكون «سلامتك يا عمري..» إلا إنها طلبت هذه  
المرّة طلباً بسيطاً جداً:

«أنيد من تخصص كوي ملابسك من تنجع اليوم، تكويني تنونتي النيني  
وخميصي الفختني.. حبيبي حياتي صنوحتي!»

أنا رجل كلاسيكي، وأقدس النساء الجميلات، وإذا كويت ملابس،  
فبمزاجي، ومو غصبن عليه!  
والله مو غصبن عليه!

## من يا عمّام؟

اليوم وإحنا نترى، أنا والجّمّار، إجا بيالي أسألها:

- أجليج بعد روجي إنت من يا عمّام؟

- أوه، يعني تريد تُعرّف Family tree ماتني؟

- شيني؟

- شوف صوصاتي، آني Tribe مالتنا Very big وإحنا من كلان

إسمها المصاليخ..

- مصاليخ؟!

- لا يروح بالك بعيد، الشغله مو Striptease، إحنا من كنا كرفان

ترييس، كان يصير دائما عدنا Battles وأجدادي من كانوا

يقاتلون كانوا ينزعون تي شيرتاتهم لو البديات مالتهم، لذلك

سموهم Clothless وهذا كان يعتبر نوع من Bravery!

- أشوفج تختنكين من الملابس الهواي!

- أنت من أي تريب حبيبي؟

- أنا من الطويرات تريب، والكلان مالتنا اسمها السحالات!

- كولش م حلوة أسماؤكم سويت هارت؟

- هاي الاسماء، لو تشوفين الافعال، تديرين وجهج!

- أصبلك Turkish coffee عيوني لو Green tea أحسن؟

- لا والله، مشتهي راشي!

## عيد ميلاد هدى!

طبعاً اللي يسمع بهدى، وعيد ميلاد هدى، وكيقة عيد ميلاد هدى  
 الاربع طوابق، وعزيمة بيت أم هدى، وستان أم حسام الماركة اللي راح  
 تروح بيه لعيد ميلاد هدى، يتصور هدى فد قيمة اجتماعية بالمحلة!  
 هدى عمرها ٨ سنوات، چلحة، ملحة، وما تسبح بس بالاعيايد  
 وبدخول السنة، وما تمشط بس الجمعة بالليل...مخلگنة، ودوم لابسه  
 تراكسوت أحمر فاقع لونه، ومن تشوفها ما تعرفها؟ ولد لو بنية، شعرها  
 ولادي، وتعارك وي الرايح والجاي!

طبعاً كلما تلاگيني هدى، تسلم عليه بحلگها الفاهي:  
 «شلونك عمو أبو فصّوع»!

من عابت هل حلگ المسعبل، وعوده من هالخلق المغلبة!  
 طبعاً أم هدى ما ينطبق عليه المثل اللي يگول: «فالها بأطفالها»..  
 فهي أستاذة جامعية مرموقة، وبالغة الاناقة، ومن تطلع الصبح بسيارتها  
 النيسان الفيلية اللون، تبدو هدى وهي مجلبتلها من جامة السيارة على فد  
 شي سخيف أكيد، كأنها أطفال الشوارع اللي بيعون كلينيكس وشعر  
 بنات وبازة وعلج أبو السهم بالترفك لايتات، واللي هم يعتبرون من أهم  
 معالم (العراق الجديد) كلش!

هدى أم شعر (المجّبن) تذكروني دوم بجارة الطفولة والصبا (سنيوه أم عطوب)، هاي الطفلة (الدبسة) التي قضت أول عشر سنوات من عمرها تبجي وخشمها صاب وراسها يحكها، ويمكن ما سابحة من انولدت بمستشفى سوگ الشيوخ، بحيث اذا تذبها بنهر الراين، يخط!

أم حسام رجعت من الصالون كأنها أميرة، تسريحة الشعر راقية، النfnوف عبالك مالت الاميره ديانا، الاظافر مصبوغات بني ذهبي لامع، ومكياج خفيف وحديث، والكعب العالي مسوي اجواء مو طبيعيه. العرض واحد: كلشي غاعد بمكانه!

سألتها:

بالله هاي الكشخة والدوخة والمصاريف كلها علمود هدى أم النخارير؟

أجابت بهمس:

هدى بيش كينو (كيلو)؟

النينه (الليلة) عيد زواجنا، ومسويتلك شكن بنوگنام (بروگرام)

يجنن!

ألوبن..

## فالتاين دي

٣٥٠ شمعة حمراء معطرة

٢٠٠ دب أحمر

٢ دب بحجم احمد أغا أيقونة الغوث المعروف.

١٠ متر سجاد احمر بعرض متر و١٥ سم.

١ بيجاما فيكتوريا سيكرتس حمراء

٤ شغلات فيكتوريا سيكرتس حمراء أيضا

١ طن ورد أحمر طبيعي

٥ طن چوكليت أحمر توفي نعوش

١٠٠٠ نفاخة حمراء بكافة الاحجام

١ عقد لؤلؤ بحجم خرز متصاعد

٦ ستائر قديفة لون أحمر

١ ريشة طاووس

إنه الفالتاين داي، وأنا گاعد من الفجر أنفخ نفاخات، وافتح الدببة من الجياس البلاستك، وأفرش السجادة الحمراء من باب البيت لحد الباب الداخلي، وأصف الشموع الحمر كما سور من النور، سيحمي النور الذي سيسير: متبختر، متاقلا، متدلعا!

وصيت سلوان أبو الكيك على كيكه عشر طوابق، كلها كريمة بيضة  
وگلوب گلوب گلوب حمر!

اليوم يوم الدلال لحبيبة القلب، اللي بايته لأول مره خارج البيت  
يم (خاله أم مهيمن) اللي رجليها المتشدد بكلشي يعتبر «الاحتفال بعيد  
الحب حرام وفيه تشبه بالصليبين».. إبنل إبنل

وطبعا هيچ ناس مو مال واحد يجاوبهم، ولا يناقشهم، ولا يداهرهم،  
ولا يعتبرهم گايلين شي أصلا، تركهم يسولفون بو حدهم أجدى وأنفع..  
وطبعا لا عبالكم خاله أم مهيمن هم مثل أبو مهيمن دينها ومعبودها  
تحريم كلشي والتضييق على الناس!

أم مهيمن بلغت الـ ٥٥ عاما بصعوبة بالغة، فالشباب لا يريد مغادرتها  
لفرط محافظتها عليه، أم حسام تسميها «گوگوش»، ومهيمن إبنها يسميها  
«سهير رمزي»، بينما أبو مهيمن الكآبة يسميها «حجية بلقيس»!

أم مهيمن كل همها بالدنيا مساعدة الناس، وتوزيع الحلويات على  
جهال الشارع اللي يعتبروها «أنجلينا جولي حي التعاون».. وهي كلش  
عاجبها هذا اللقب، ولو أبو مهيمن يعتبر السيدة جولي «جاسوسة»!

اليوم عيد الحب، وخابرت محمد چمبر چوري يجيب فرقته الموسيقية  
ويوگف بالباب يستقبل سيدة الحسن والجمال، وهي تنزل من سيارتها  
قادمة من بيت خاله أم مهيمن، ويقف المحافظ شخصا عند الباب حاملا  
مخدة من القطيفة الحمراء، عليها مقص احمر، لتقص الشريط الأحمر،  
إيدانا ببدء الاحتفال بعيد الحب..

وسنحرق الجو هذه الليلة، وريشة الطاووس التي لا تفارق يدي

سيكون لها أهمية بالغة في هذا الاحتفال البهيج!

الله أكبر..

وليسقط أبا مهيمن ومن لف لفه..

ويعيش المحافظ!



## فيزا الى لندن

والله ذبحني حسومي افندي يوميه طالعلي ببلتيقه شكل، يوم يگول:

«ينرادلك دعوه من جهة اعلامية أو مهرجان»

ومرة يگول:

«إلا دعوة من واحد بريطاني»

مرة يگول:

«يصير من عراقي بس مقيم بصورة قانونية وعنده ملك بإسمه يله  
يگدر يسويلك دعوة، وعلى أساسها تسويلك سفارة بريطانيا ببغداد فيزا  
الى لندن!»

ميت أريد أشوف بيگ بن وساقيل رو، وأم حسام تريد تشوف قصر  
بكنگهام، وتريد تشوف الليدي ديانا وين ترعرعت، ووين كانت تگص  
شعرها، ومنين تشتري نفانيفها. واذا عدهم (فكتوريا سيكرت) بلندن  
العاصمة: فعيد وعرس وزياره!

اليوم خابرتة لل (سليت)، يگلي السفارة تريد منك دليل على انك  
ترجع للعراق، والا ما تنطيك فيزا!  
أبول الأبول: منين أجيلهم دليل، آخذ السفير البريطاني للعباس أبو

فاضل أحلقفه، لو نتكاتب يم سيد مالك، لو انطيه شعره من شاريبي الفها بورقة بافرا؟!

گول ما أريد تجي للندن، هاي أبو السيته فيته، حتى لا نشوف سوافك، ونكشف اسرارك!

- إيني عفيف، وگلبه أبيض مثلي
- هو اللي بلندن ويصير عفيف الا سلمان باك!
- شنو سلمان باك؟ شنو قصدك صالح بيگ؟!
- أنا غلام أبوي، صارت بالسلاح الأبيض! قصدي لندن، تفتح عيون الناس، وحسام بعده ما متزوج، وشباب.. وتدرين..
- إلا حسام! آني إيني صارفه عليه بالعمله الصعبة، وما مكن يكون مبتذل مثل ما حضرتك تشوفه!
- حضرتك!
- إي حضرتك!
- أنا أترخص..
- وين رايح؟
- لأهلي..
- وأنا شنو؟ بيت جيرانكم؟ لو بيت أم خليل الحفاهه؟
- اليوم الحچي ما يعجبني بتاتا، فأروح أحسن ما نتعراك..
- وهذا العشا منو ياكله؟ والكنافه بالجبن منو يحلي بيها؟ والنرگیله الكرز منو يارگلهها؟
- ما أشتهي السمچ هسه!
- وهذا القميص الهرير الاسود التويل أبو الجاكه الواصله للعزيز،

وعطر الأوبزشن اوف كالفن كلين إن يو أس أي آرمي؟

- ها..

## عيد الرجل

نسيت أن أكتب عن إحتفاء أم حسام بي في عيد الرجل، يوما مميزا كان، منذ الصباح كان وضع البيت مختلف عن بقية الصباحات، أصرت على أن تكون ملعقة (العسن التبيعي) هي أول ما أفتح ريقى به، وبيدها البالغة الترف.

اما بقية الفطور فهو: كل شئ بالزعر، لبنة مدعبله غارقة في زيت الزيتون البكر ومدمج في ثناياها زعر أخضر بالسّمسم، لبنة فوقها رشّة زعر، بيضة نصف مستوية بالزعر، منقوشة بحجم لقمة بالزعر، وخبز العباس بالزعر..

تقول أم حسام إن الزعر:

«ينشط الذاكنه»!

لا أدري لماذا تريدني هذه السيدة التي لا تكبر أن أكون بذاكرة متقدة، اليوم على الأقل.

- أگنك نجني؟

- ماي عيون رجليج..

- نا تنوح للدوام اليوم.. عفيه!

- إشتعل أبو الدوام، هسه اخابر المدير أگله أريد اجازه سنه بدون

- راتب!
- مو الهدنجه!
  - أحرگ الجو و علي بنیطالب!
  - أنید تنوح ل سنوان ابو الکیک تجیینی کیکه بیها حصان!
  - وین أكو کیکه بیه حصان!؟
  - ما!
  - أشعل أبو أبو سلوان!

## الزواج امرأة

أحلى ما في الزواج: أنك تتصباح بوجه صبح مبتسم طفولي ناعم،  
يقول لك:

«نام على وجك، دا سويلك چاينا مساج، حمامك جاهز، والريوگ  
تريده بالمطبخ، لو أجيبه الك بالبانيو»

مع أن خالتك حالتها خطرته وبالانعاش، والماي مگطوع من البارحه،  
والوطنيه طافيه، وفصوع ما راح للمدرسة، وبيت أبو زهراء عازمين  
نفسهم ع العشا الليله بييتكم!

الزواج: إمراة.. خالي

## يخرب بيوتكو!

العراق دا يخ ب "داعش"، وأم حسام اليوم دازتلي هذا المسج، سمعت عندي نيه أروح لمصر برمضان، لأنني سمعت مرة العواد العراقي الشهير نصير شمة يقول بأن:

«أحلى رمضان شايفه بحياتي هو رمضان في القاهرة!»

حيث تتزين - مع ثبوت رؤية الهلال - هذه المدينة العريقة والمزدحمة بالفوانيس الملونة، معلقة أو محمولة بيد أطفال ينشدون بفرح:

«رمضان.. حلّوا حلّوا حلّوا!»

أصوات الشيخ محمد رفعت والشيخ عبد الباسط عبد الصمد والشيخ محمد صديق المنشاوي والشيخ محمود خليل الحصري وأدعية الشيخ محمد متولي الشعراوي في كل مكان في القاهرة، ما يجعل روحانية هذا الشهر الفضيل في قمتها.

والمأكولات المصرية والمشروبات الرمضانية والحلويات المميزة والمهلبية وأم علي، تستحق في مجملها الذهاب الى هذا البلد الجميل المحبوب، علني أشرب من نيلها فأعود لأرض الكنانة ثانية.

المهم، أن أم حسام كتبت في المسج الطويل ما يلي:

«عندك ست حلوة وبتطبخ كويس، وكل ليلة خميس بتعمل أگواء  
وحاگات - عشان حضرتك ملول حبتين - ومتگوزها بئالك عشره  
خمسطاشر سنة، وعينك زايغه اليومين دول وعاوز تنزل شرم الشيخ  
عشان عاگبك تدي دروس خصوصية؟»

إتصل بينا على زيرو خومسومية تلت تسعات تمنيه، وإحنا نبعثلك  
الواد حنفي بطيخة يدملك بالبونية على دماغك ودماغ الخلفوك، عشان  
إنت مش وش نعمه يخرب بيتك وبيت اللي خلفوا خالتك! كول ده بميه  
وعشرين گنيه وتسعه وتسعين ثرش من غير أگور الشحن!  
إتصل.. م ترددش «



## فطور في بيت أم حسام!

أحلى شي من يصير الفطور ببيت - ماي العيون - أم حسام، فأنك  
- ي بنادم - كأنك تفطر في أي بلد آخر غير العراق، فبالإضافة للاجواء  
الرمضانية الهادئة، وصوت ترتيل عبد الباسط عبد الصمد الذي يملأ  
الدار قدسية، فإن هذا العشاء اللطيف أبعد ما يكون عن الأخبار، وداعش،  
والخلافة، وكل هالخرابيط والبرابيط العربية والإسلامية، اللي خلت  
الواحد يستحي يگول:

”أنا مسلم” أمام لندنني مثل الريبب العزيز: حسام!

عاد الفتى من لندن، بوجه حليق، ويسلسله ستانلس ستيل ضخمة،  
تتدلى منها ميدالية السلام الشهيرة، وعقل متفتح، ووجه يضحك للهوا  
الطاير!

سألت أم حسام:

- أشو الأخ فاطر، وين راحت اللحية والمسواج، والطمغه اللي  
بگصته؟

- أنا ليش رغبتة بروحة لندن يا صنوحتي، هذا عباله الدنيا بس  
العباسية وحي البعث، بس راح لبلاد الاوادم صار آدمي، لأن  
بذرتة طاهرة.

- والنعم والله، بس ليش ما صايم. يعني «لو هرا لورا»؟!
  - إسأله!
  - عيب أسأله، هاي شغله شخصيه، وذوله اللندنيين كلشي ولا البرايفسي مالتهم!
  - أني سألته!
  - وروح الحسين؟
  - والحسين الشهيد!
  - صايره تحلفين مثلنه
  - ليش هو طابو بس الكم؟!
    - وشجاويج؟
    - نوحتي، هذا يگول إحنا العراقيين كلنا بالجنة، لأن الله سبحانه وتعالى، عذبه بالدنيا، فأکید يوم القيامة للجنة عدل وگبل، إحنا وچلابنه<sup>(1)</sup>؟
    - چلابنه؟
    - إي مو حسومتي حبيبي عنده بلندن چلب عنوني اسمه: دودي!
    - دودي؟
    - إي دودي. حتى أقنعني أجيلي فد چلب زغیروني أریبه، وأتونس عليه هنا، وإقترح عليه أسمیه: عوعي!
    - عوعي!!؟
    - إي شبيك أشو تضايقت، عندك سنستيف من عوعي؟

---

(1) كلابنا

- أكلچ هذا نفنوفچ لندني؟
- گوم.. گوم.. لشتي تگوم ترجف من تسوي حرکاتك هاي.. توبه  
استغفر الله.. توبه استغفر الله
- يعني لندني؟
- أووف صنوحتي.. نوح.. نوح.. لا تعصبي

## هله هله ع الجد

من طلعت من الحمام متلفعاً بالروب القطني الناصع البياض، وجدت  
 أم حسام مخليلتي غلابيه مال مصريين، وسديري مقلّم، مليان دگم!  
 لبستهم، ورحت للمطبخ أشرب قرفه!  
 لگيتها لابسه هم غلابية كلها بُلک<sup>(١)</sup>، ولصافيات<sup>(٢)</sup>، وبيها فتحه -  
 العرض واحد - واصلة لزاخو<sup>(٣)</sup>!

گالتلي:

- شوف يا معلم صالح
- نعمين يا ست الكل
- هله هله ع الجد..
- والجد هله هله عليه
- انا تعبت يا معلم..
- نتطلق؟
- تف من بقك يا خويه، قال نتطلق قال؟

(1) ترتر

(2) أشياء لامعة

(3) مدينة في أقصى شمال العراق

- آمال إيه الحكايه يا ست الستات
- يا خويه تعبت من الاخبار وداعش والواد عبوب<sup>(1)</sup> وخطب  
الجومعه والنجفي والكربولائي والخليفه القرشي..
- ونعمل ايه يعني؟
- نبطل سياسة شويه، نديها MBC، على شويتين فتايت، على  
ناشيونال جيوغرافيك، وعلى براد بيت..
- براد بيت دا ايه
- واد سكره، مقرمش..
- إهيسيه!
- انا ما بحبوش، واد مابع ومايص وعيالو مجمعمهم من اليونسيف!
- وعاوزه ايه كمان؟
- عاوزه اتدلع يا معلم
- اشمعني؟!
- يا معلم، احنا صنف الستات بنحب الدلع، دلعني سايقه عليك  
النبى..
- ح ادلعك يا منجهه، وما فيش سياسه من النهارده، في حاجه  
تانيه..
- خليك حونين عليه
- ماشي
- حونين ثوي

---

(1) نعيم عبوب: أمين بغداد

- ماشي
- حونين ثوي ثوي
- ماشي يا وليه بلاش فضايح!
- يقطعني يا خويه، والله ما قصديش حاجه!
- عيني ف عينك كده
- هههههه جتك إيه يا سبعي!

## شاعرة وجنتلمان

ما أدري؟ كل النسوان تصير شاعرات من تمطر الدنيا، لو بس حظي؟  
 أم حسام دزتلي مسج - قبل هنيه - كاتبتلي بيه:  
 «مداد شراييني، وروح روحي، وسواد مقلتي، هلا أحضرت لي معك  
 بعضاً من الكنافة بالجبن، عليها همسة من فستق حلب، وإذا إلتفت يمينا  
 وأنت عائد بإتجاه عشنا الذهبي، ولمحت كرار أبو الشربت يبيع عصير  
 الزبيب الأسود المحلى بالعسل، ورغبت أن تذوقه جاريتك المطيعة  
 فعليك بلتر لا حرمني الله من دفء راحتك!»  
 دلفت لصاحب «الكنافة النابلسية» فأبتعت صينية كاملة، طلبت منه أن  
 يضع فوقها رطل من الفستق الحلبي المطحون.  
 وحين قفلت عائدا الى عشنا الذهبي، لمحت كرارا أبا الشربت، فنزلت  
 عليه كالصاعقة، أمرته أن يملأ لي برميلا من شربت الزبيب المحلى  
 بالعسل، ففعل، فنقدته، واسرعت الخطى!

## شتاء بلا فتايل

أم حسام بعد أن فرشت البيت إستعدادا للشتاء القادم هذه السنة بكل قوته: مطرا ورياحا ودرجات حرارة منخفضة، أصدرت فرمانا بعدم إستخدام المدافئ النفطية، في الهول والإستقبال وغرف النوم! وإقتصار ذلك على المطبخ فقط اذا (اضطرينه كولش) ، طبعا اصدرت هذا الامر وهي لابسة البيجاما البازة (الكافظه) ، اللي تسميها بدلة العمل، وطبعا مو بيجاما بازة من ذني اللي چانت تخيطهن الحجية ل مفيد عباس؟  
لا يابه.. لا

هذا سيت بجايم من زمان جابه خالو شامل من (كي مارت) وبقت منه بس هاي بدلة العمل.. طبعا غير نسوان: تلبس هيچ بيجاما بليلة العرس! بس الناس مستويات مثل ما تعرفون..  
انا ليش احب هاي البيجاما الكافظه، اللي تكول عنها أم حسام: خاشه بالخسل؟

مدري لان دوم اشوف جمارة گلبي على ٢٤ حباية، وبس بهيچ يوم أشوفها على ٢٣ حبايه، مدري لأن الملابس الخاشه تطلع الواحد: يجنن! اذا استلمنا الراتب مال شهر ١١ وبيه الفروقات والزيادة - اذا اقروا



الميزانية - لازم نشترى صوبات زيتية (م بيها دُخان يخنوگ، ويسود الحياطين) وإلا ما تكون أم حسام راضيه، وبالتالي: لن نقضي شتاء دافئا، فكلمة (حشاشة يوفي) واحدة: (ماكو فتايل السنة يعني ماكو فتايل)!

## عيد ميلاد هدى

بيت أبو هدى مسوين عيد ميلاد هدى، وإحنا ما دام اليوم عيد ميلاد هدى، ف لازم ندخل بالانذار، أم حسام لازم تروح للصالون تصبغ وتتشور وبدكير ومنيكر، ونفوفها اللندني لازم يروح للوندري ينغسل دراي كلين، وما ينكوي زايد لان ماركه، ودازه ” حسومه حبيب ماما ” من لندن مشتره من هارودز بالتزليات بالف جنيه إسترليني!

راح يخبلي حسام، ما شايف هيچ ولد مداري أمه ” الأرملة المغناج ” سابقا، وسيدة روعي وأميرة قلبي حاليا، لا مخلي عطور ما يدزلها، لا مخلي مكياجيات، لا بجامات ستان، لا نفايف.

وذاك اليوم رحتمت طرد بريدي دازه من أميركا - بزيارته الاخير لهخاله رمزي - وتورطت أخذته ويبي للدوام وفتحته بالمدرسه گدام المدرسين.

عباري دازلي فد قميص، بنظلون، بلوز، (جفية عب)، گلت ما لي گلب انتظر لنهاية الدوام، وبعدين اروح للبيت، يلا عود افتحه للطرد. المهم: فتحته، والمدرسين كلهم فوگ راسي، وملتمين يريدون يشوفون ابن العزيزه شداز لرجل أمه.

فتحت الكارتون واذا هالحسام الغيره سز، طاب الظاهر لمحلات

(فكتوريا سيكرت) وما مخلي شي ما مشتريه للسيدة الوالده، وهم المدرسين شافوا ملابس نسائه داخله ستان على دانتيل على مدري شنو، وصارك الضحك ما اله والي!

وصرتلك انا مثل المدري شمسوي بالديوان، وما لملت كارتونتي، ورحت ركض للسيارة الا عيوني خضر، وضربت الدوام وعدل وجيل للبيت، طبغت السيارة بالباب واخذت الكارتون وطبيت بكل عصيبي المعهوده، وصاير نار وشرار، دخلت على ام حسام للهول وشمرت الكارتون بالكاع وتناثرن الملابس على السجاده!

گلتها: شوفي ابنج الشقيّه شداليج من واشنطون دي سي!  
گالت: حسومه حبيبي حياتي، دازلياهن كلهن گلگلي، شگد يعجني هالولد، أوي ماماتي، أصعد أگدرهن كولهن!  
أنا شورطني وي هالفطر؟

## دكة خالي أبو محمد

مأثره حيل بأم حسام، والظاهر كلش خايفه لا يطلع: « ثلثين الولدع الخال ».

خالي أبو محمد من راح يخطب " شاهينه " بت حجي فاضل لإبنه محمد، تعجب من جمال ورشاقة وأناقة الأخت " شاهينه "، ومن جابت الهم الجاي، وهدل شعرها، وتلاغت العيون، سقط خالي عسكريا!

صار تحت مرمى المدفعية الشاهينية، وخالي كلش روحه خضره، والبت بعدها شباب، ومرصوصه رص على حد تعبير خالي أبو محمد.

لهسه يسولف خالي بالعطر اللي مخليته " شاه " - والتعبير دوما للخال العزيز - يگول من طب العطر النخاشيشي، وإستوطن ب " ريتي " إفترت الدنيا بيه، وتذكرت العمر الراح هباء منشورا وي " كميلة " والعمر اللي راح يروح هدرا معها، وقررت!

أطگها للسالفه اللي ببالي، و« لو هرا، لو ورا »، إذا لچحت فكان بها، وإذا دگست ف « يا سته مع الستين »!

توكلت على الله وقريت بگلبي آية الكرسي ١٦ مرة، وفتحت الموضوع وي حجي فاضل، أشو الحجي ما عنده مانع چنه، وبس خلصت حچيي، گاللي: « گبعها وإخذها » أبو محمد!

گتله: حجي فاضل! ترى إلی موش لمحمد!

گاللي: محمد بيش حگه.. الفاتحه!

وطگتنه ” شاه“ بهلهوله ام النص ساعه!

أم حسام اليوم مسويه ” نيو لوك ” ومن طيبت للبيت ما عرفتها.

حسبالي: أنجي أم النشرة الجوية!

المره طالعه كشخه وهيبه، ورموشها يطخن بالحايط، والخصر مبروم

برم، والكحل واصل للإذانات، ولا بسه مدريشني كله: دانتيلات..

دانتيلات.. والعطر واصل لبيت أبو مهدي براس الشارع!

گتلها: يا هي هاي؟ أنجي؟؟

گالتلي: عابتلك! أنجي بيش حُوگه؟!

أموعن

كلما تمطر الدنيا إترُم<sup>(1)</sup> عليه أم حسام نطلع نفتر بالسيارة، والماسحات  
تشتغل، ونجاة الصغيرة تصرخ:

أنا بعشق البحن!

ولازم أنا أسوق على كيف، ولا بس نظارتي ” الريان ” وطالع چني  
جوليانو جيما، وهي حاظه راسها على كتفي الايمن وتغني وي نجاة:

أنا بعشق البحن زيك يا حبيبي حنون

وساعات زيك مجنون

ومهاجن

ومسافن

وساعات زيك حينان

وساعات زيك زعانان

وساعات منيان بالصمت

انا بعشق البحن

انا بعشق السما

---

(1) تجبرني

عشان زيك مسامحه  
مزنوعه نجوم وفتحه  
وحيبه  
وغريه  
وعشان زيك بعيده  
ساعات زيك قنيه  
بعيون متنغمه  
انا بعشق السما  
انا بعشق الطنيق  
لان فيه نقانا  
وفنحنا  
وشقانا  
اصحابنا  
وشبابنا  
وفيه ضحكة دموعنا  
وفيه بكيت شموعنا  
وضاع فيه الصديق  
انا بعشق الطنيق  
انا بعشق البحن  
  
وبعشق السما  
وبعشق الطنيق

لأنهم حياة  
وانت يا حبيبي  
انت كن الحياة  
وكلما وصلنا لحلويات الميالي وهمست بأذنها:  
مستهية كنافه بالجبن؟  
- تبرطم وتقول:  
- ما أگدن آكون أخاف يصين عندي كینش!  
يمه فدوه لكريشاته



## أهم شي الأخلاق!

- وهات لي قلب، لا ذاب ولا حب، ولا إنجرح، ولا شاف حرمان،  
وهات لي قلب، لا ذاب ولا حب، ولا...

دا انزل الدرج، الساعه هسه بالاربعه ونص العصر، إستوني گاعد من  
النوم، رمضان كريم عليكم، بشهر البركه والبيض وطماطه والنوم.  
أسمع ام حسام تدندن بالمطبخ بهذا المقطع، اللي تعودت من اسمعه،  
معناها ترافقه اهتزازات، ووصلة رقص خفيفه، تدع بيها - ماي عيوني -  
أيما إبداع.

يمكن أنا ما گايملككم شغلة، ترى المره اللي ما تعرف ترگص، ما تسوه  
ست فلوس، الواحد يرجعها لأهلها وياخذ فلوسه أحسن، لو حتى فلوسه  
يعوفهن، بس ينفذ بجلده.

أكو ناس يگولون الرگص مو مهم، المهم الاخلاق!  
طبعاً هيج ناس احترم رأيهم، بس الحقيقية أضحك عليهم (بعبي)،  
شنو الرگص مو مهم؟  
مو هذا يفتح عليك الباب على مصراعيه، ويصير:

الجمال مو مهم

والنزاهه مو مهمه

وعدم وجود الكرش مو مهم

والاناقه مو مهمه (الواحد المهم يظل لابس اشياء مريحه)

واخر شي:

تصفى لك على مره عدها شوارب وزلوف، وتدخن جگاير وتنفخ  
بوجهك، ورحاتها مال الفك العلوي من الجهتين واگعات  
وتمسح خشمها بردنها!

شد على المواصفات، خلي اللي گبالك تشد نفسها..

ورتب حالك: ترى الرجال ميرادله هوايه شغلات..

زين لحيتك بين يوم ويوم، ولا تفارگ فرشاة الاسنان ببداية اليوم  
ونهايته، واي معطر جسم عسى مال أبو دولار.

سألت أم حسام:

- أگلچ اليوم جلسة البرلمان لو باچر؟

- قل للزمان ارجع يا زمان..

- يگولون مية واحد مرشح للرئاسة؟

- وهات لي قلب، لا ذاب ولا حب..

- زين صدگ حنان الفتلاوي تريد تظهر الوجه العربي للعراق؟

- تفيد بيايه يا ندم يا ندم..

- أگلچ إذا أخذنا شور، توگذر ان ذا باث روم، خو ما نفطر؟

- نو، ات ازنت، گو، أند اي كو بيفور يو سویت هارت!

- وهات لي قلب، لا داب ولا..

## حندة

شكد حلو إذا واحد متزوج وحده صوتها حلو ويومية تغنيله:

«هسه ينام صوصه ينام

ونذبعله طير الحمام

روح يا حمام لا تصدق

نضحك ع صوصه تينام

صوصه صوصه الحندقه شعرك اشقر ومنقى

واللي يحبك بيوسك اللي بغضك شو بيترقى»

اليوم نشدت خالي أبو محمد عن معنى كلمة حندقة، حتى أعرف أم

حسام شنو قصدها من تكرار هذه الاغنية يوميا على شيبى؟

خالي ابو محمد عنده خبرة باللهجة اللبنانية - فقد كان ضمن قوات

خاصة عراقية شاركت بالحرب الاهلية اللبنانية بال ٧٦ - وثابرناب”

تؤبرني وتحفر ثبري بدبوس!»!

سألته:

- خالي شنو يعني حندقة؟

- خالي شنهي الغظية: حندگوگ!

(يعني أنا بنظر أم حسام محض حندگوگه؟ مع الأسف عليج: حندقه)

## العجايز البركة

تحس عندك ملاك من ملائكة الله عايش وياك بالبيت، والعجايز كما الشياب لديهن مقولات حكيمة، ونصائح ذكية لكل ما يمر به الانسان من ضغوطات الحياة.

الحجية أم ناصر أو أمي الحجية كما كنا نسميها، هي زوجة أبي الكبرى، هذه السيدة الملائكية الهادئة، والتي قامت بنفسها بخطبة زوجة لابي - هي أمي - يوم أراد الحجوي يجدد فراشه لأسباب جيوسياسية، لها عدد كبير من الأقوال المأثورة إختزنتها ذاكرتنا (العائلية).

تذكرت اليوم الصبح قولاً لها، ينطبق على حالة (الوله) التي تصيبي كل ما فارقت السيدة الفاضلة أم حسام لساعات الدوام اليومي، فأنا يومياً أظل (أحوص) أريد أرجع للبيت، ولأنني لا أستطيع الى ذلك سبيلاً، أسلي النفس بالاتصال بها- كل شويه - بمناسبة أو بدونها لأسأل عن مدريشنو ومدري إيش، ويوميه أتذكر قول أمي الحجية:

«يمه الكلب ملعون والدين»!

## الغيرة القاتلة!

من يتعلق الامر بالغيره أم حسام ما عدها لحيه مسرّحه، وحتى الخنّه  
تروح، ولا أكو أرواب كريستيان لاكروا، ولا أكو "أشياءات" فكتوريا  
سيكرت، ولا تشتري دولتشي أند غابانا بطگاگيه!

اليوم من الصبح - وي طگة البريج - گالتلي:

- شوف أگلك صالح (ماكو صنوحتي ولا ننوحتي) أني عندي "

لحيه المومن مكناسه"، تجر عدل: أهلا وسهلا ومرحبا، تگوم "

تجر على ظهرك": أراويك "وجهي الجينكو"، شكلت؟

- أولت لا اله الا الله!

خميس مبارك!

## بيت أبو رافد

اليوم بيت أبو رافد خطر عدنه وأم حسام هاي رابع مره تبدل  
ملاسها، استقبلتهم بتنورة طويله وقميص كريمي، إنوب لبست بنظرون  
كتان كريمي وقميص لينن سمائي، ومن خلصت تحضير الغدا، لبست  
ثوب إماراتي مكعب وإيشارب حرير كريمي، ومن جابت الجاي طبتلنه  
بتنوره بالغة القصر كريمي وقميص وردي روز..

شكريه مرة أبو رافد - أخو أم حسام - گامت تطلع دخان من إذاناتها،  
وتضحك وتسولف جذب، وانا كل شويه اباوع لأم حسام بلكي تگرصها  
شويه وتبطل تبديل، وهي تسوي روحها ما منتبهه عليه!  
شويه:

وزرگت لفوگ تبدل، وچان أزرك وراها، لكفتها فاتحه الكنتور،  
وچان ألزمها:

- إنت شنو تخبليتي؟
- لا ما تخبليتي!
- چا شعده؟ عرض أزياء اليوم؟!
- إي عرض أزياء! حتى تبطل شكريه خاتون تجي بدشداشة البيت  
وعباية مخربطه! شفت بدلة أبو رافد الفريسكا والربطة اللانفان؟

والسبحه الكهرب والساعه الرولكس والجداحة الرونسون، م

تباوع وتتعلم هالذوق سز!

- بس عيب أخاف تحس

- خلي تحس.. لعد أني مسويه هذا الجنجر ص كله لويش؟

## قندرة أم حسام

أكو قندره زغيرة عد أم حسام، لونها وردي أو فوشي إذا صح التعبير-  
وطبعا قياطينها هم وردي بنفس درجة لون القندره أعلاه.

طبعا قياس رجل أم حسام ٣٧، يعني قياس اميرات، والقندرة رياضية  
وكتان، وبها حافه بيضاء من الكاوتشوك في قاعدتها، مزدانة بنجوم  
صغيرة وردية اللون أيضا.

الحاصل:

القندرة حشاكم چنها چكليته ماكتوش، وطبعا صناعتها فاخرة،  
وماركة، أم حسام تسميها:  
ترينشوزي الكوتشي!

يوميا أم حسام عدها ساعه ونص ” نياضه ”، تلبس ترينينگسوتها ال  
umbro «النصاصي» فاتح، وتظل تگمز على چلاويي، ساعه تسوي  
احماء، ساعه تسوي خمسطعش دوره حول الحديقه، ساعه تسوي  
«تمانين» سويديه، وتخرخش، لابسه درزن معاضد، وگلايد وخرز،  
ومدریشنو..

وآنه ألوبن

وما تدري سبب لوباي..



قندرة أم حسام تذكرني بجماعة ختياريه، لاگو صديقهم بيباب الحسين، وصار لهم فتره ما شايفيه، سألوه:

- ماكو أبو علي هالايام، صار فتره ما نشوفك؟
- والله چنت مسافر لبيروت
- وشجبتلنه من بيروت؟
- كلشي ما جبتلكم!
- شدعوه يا أبو علي؟ لو ساد حلو گنه بقنادر!

## 27 ربيعا

راح بصير عمري ٣١ سنه وشهر وأم حسام تدخل بال ٢٧ ربيعاً، ولي  
هسه تتصرف وكأنه عمرنا لم يبلغ سبطعش سبطعش ثمنطعش تسعطعش  
سنه!

عجيبه هاي المره، لا تجل ولا تمل، البارحه مدري شنو عدها تبجوش  
فوغ السطح، ومن سألتها، گالت ماكو شي: هيچي شغنات وأشيئات!  
ماعرفت شنو هي ال شغنات، بس أعرف ماكو طگطگه عدها بالخالي  
بلاش، اليوم المغرب رجعت للبيت، وبس طبگت السياره، دگتلي  
تليفون:

- أنوهنو

- هلو حبيبة روعي، انا بباب البيت

- ادني، شفتك من فوغ السطح

- وشعندج فوغ السطح المغرب، الهوا بارد، وانت الله يحفظج

دوم مصيفه زايد!

- نابسه بيجامتي ال گي لاروش وفوگاها الروب ال تناغرا.. لا

تخاف عليه

- مو تستبردين يا بعد بيتي وانت دوم غاطه بالبانيو.. و ٢٤ ساعه

شعرج مبلل!

- أمممم، هوايه تحجي! أدوخ هيچ؟

- جبتلج..

- خني النبي جايه بنمطبخ، واصعدني نسطح بسنعه

شبختين، ولني بالسطح..

هاي شمسويه، السطح صايرلك غابه من اشجار الزينة ونباتات الظل  
والورد، والكلوبات: أحمر أخضر أصفر أزرك، تگول بيت سيد جعفر..

وناصبه خيمة زغيره مال رحلات، وميز طعام وكرسيين، ومنقلة

شوي، ونراگيل، ودلة گهوه، وكول بوكس مدري شنوبيه!

- تعان أوگعود گباني يا سنطاني وسنطان زمانك

- حبيبة روجي، خلي انزل اخذ شاور، والبس گليتي الكريستيان

لاكروا، وفوگاها الروب البازه التوم فورد وأجيچ

- لا تبذن ونا تغسن، انا احبك هيچ، (روائح العوده الى البيت)

تجنن!

الشاور ينشط الدورة الدموية وينعش القلب!

- بس نا تتأخن عنيه.. أستاحش!

- مسافة السكه يا ست الستات

- م تعوئش يا سبعي

- فوريره

- يوه گتك إيه

- بموت بالمهلبيه يا ناس

- حابس حابس!

## نص نفر كباب

بس شنو من كباب؟ اللهم صلي على محمد وآل محمد، يموج بالحلگ، وخفيف ع المعدة، وملفوف بگرصتين خبز حار ومگسب، ويمه طماطيه چبيره مشويه وباطحه روحها بماعون فرفوري أبيض چته رگبة ورده الجزائريه الله يرحمها.

البصل مو صديقي، بس أكو قطعتين منه ليغاد من الطماطه الشوي، هم بماعون فرفوري چته حدود مياده الحناوي، ويمهم نص شيف نارنج، متكا على فلفلايه خضرة متوسطة الحجم بيها فيتامين C حگ ٤٠ ڤرتقاله بحسب الروايات.

گلاص لبن تخين ومن أمه، قليل الحموضة، بارد وبيه مكعبين ثلج، وزجاج الگلاص من الخارج تتجمع عليه قطرات صغيرة من الماء، تجعل من منظره سارا للناظرين.

وبين هذا وذاك تناثرت أوراق الريحان والنعناع والرشاد، وغير بعيد عن الصينية الستيل، ثمة مملحة، تقف كأنها مايسترو يريد أن يضبط المصوخيه مالت الطعام، ويدوزنه تدوزن.

اليوم جمعة، وأم حسام، لابسة دشداشة العمل الكودري الزرقاء،  
ومعصبة بربطه زرقاء أيضا، ومبلشه بالبيت تنظيف، وتبديل بردات،  
وشيل زوالي، والجو محترگ!

وأنا بلايسي بيدي، ودرنفيسي بجيبي، والسكول سبانه بحزامي،  
وماكو گلوب محترگ ما بدلته، ولا حنفيه تنگط ما صلحتها، ولا مكيف  
وسخ ما غسلته، وكل شويه ازرگ بالسياره لمحل ابو حيدر اجييلي حاجه  
وارجع ع السريع.

أم حسام من البارحة زعلانة، تگول: دا حس عندك شي!

وانا مبلش شغل وياها، وعرگان، ومحمّض، وأگول:

بلکت من تشوفني (لافت حزامي) وتعبان، تصدگ اني: ما عندي

شي، وكل هاي تهيؤات لا أكثر!

- نوح جيبنه كباب للغدا

- ليش إنت ما طابخة غدا؟

- أگنك نوح جيب كباب للغدا، إنت شنو ما تعنف عنبي؟

- أنا أخو زناد، هاي الشرار يظفر من عيونها!

- شجاي تدندم؟

- أگول أجيب من كباب محمد، لو من كباب نبيل؟

- لا تطونها، مو الشياطين تتطافن گدام عيوني، لا تخيني أحچي

حچي يزعلك!

- صار، نص ساعه الكباب موجود!

- إسنع!

- صار

أنا أحب الكباب، بس مو بالغدا، الغدا اذا مو تمن ومرگ وتشاريب  
فلسين م يسوى، هو الكباب من الله خلقه: لو ريوگ لو عشا.. بس  
شتسوي لأمر الله.

من شربنه چاي، فتحت وياها موضوع الانتخابات، بلکي تنسى هاي  
القوانه مالت: دا أحس عندك شي!

- آگلیچ إنت راح المن تصوتين بالانتخابات؟

- چلبی!

- بس انا راح اصوت للتحالف المدني الديمقراطي، خوش بيه  
شخصيات، وأول وتالي المستقبل الهم، شتگولین؟

- چلبی!

- بس تدرین ممکن ما يحصل حتى مقعد واحد لروحه، بينما اكو  
ناس تتوقع مهدي الحافظ ممکن يصير رئیس وزراء اذا فلتت من  
الاسلاميين، وهذا تکنوقراط، وانت دوم تمدحین بيه وبشهاداته..

- چلبی!

- مو انت كل انتخابات تصوتيله وماكو فايده، شوفي: هذا صولاغ  
يمكن هو البديل للمالکي، خاصة انو عمار الحكيم جاي يشتغل  
شغل ما صاير، ويگولون حتى جماعة المالکي خايفین منه..

- چلبی!

- تدرین هاي قضية بنگ البتراء انوب ال TBI، كلش مآثرات على  
سمعته، والرجال ماله شعبیه نهائیا، وبعدين لا ايران تريده ولا  
امريکا ترتاحله، عكس اياو علاوي مثلاً؟

- چلبی!

- طبعا الجلبى خوش شخصية، وعقلية، وعلاقات، وراقي، وابن عائلة، وشنو؟ حتى المالكي چان يشتغل جوه ايده، والله عمي الناس الراقية اذا لزمتم العراق لتسويه: فلّه!
- گوم جييني چاي..
- أنا أخو أبوي!!

## قنوات إخبارية

حرمتمني اليوم أم حسام من من متابعة شريط الخبر العاجل مالت قناة العراقية، وطبعاً هذا الاختراع الاخباري حتى الـ CNN ما عدها منه بعز أي حرب، ولازم ينطوها جائزة أحسن سبتايتل بمهرجان ” تك ” التلفزيوني!

قناة فرانس ٢٤ هي قناة أم حسام الاخبارية المفضلة، واليوم وي العشا كان أكو تقرير عن رجل فرنسي - إسمه فرانسوا يمكن - يشتغل خبير نبيذ بمطعم.

طبعاً المطعم زباينه من نوع: هنري فورد وماستريو ماستورياني، وفرانسوا من إشتغل قبل طنعث سنه بيه، كان العمال يحتفلون بمرور ٤٠٠ سنه على تأسيسه.

هيج مطاعم أكيد ناس مثل محمد ثامر - أبو الكافيار بطعم الكمثرى - ما يگدر يمشي ع الرصيف اللي گباله.. أبو المعيد!

وبينما اني أتابع التقرير، التفت فجأة لكيت أم حسام ضاربة ميكب كامل ولابسة الروب الحريير الأسود المطعم بالدانتيل مالتها، وگاعده يم



خشمي تبرد باظافرها وكل شويه تگول:

«تره اليوم كولش حاته، مال واحد ينام فوگ بالسطح، تحت النجوم،

والهوى عذبي!»

أفكر أدير التلفزيون على قناة "آفاق"، لأن كولش حاته!

## خطوبة أم حسام

كلش مرتاحه اليوم أم حسام وعدها سالفه كل شويه تسولفها وتضحك،  
 طبعا أم حسام كائن حي عصفوري الشكل لا يمكن تخمين عمرها نهائيا،  
 تحافظ على نظام غذائي صارم، وتمارس الرياضة باستمرار.

البارحه: جارتنا الجديدة خطبت أم حسام لإبنها!

وعمت عيني كل شوي تعيد السالفه وتضحك، وتدمع عيونها من  
 نشوة الفرح.

« تگوللي:

- إنت بعدج بالكليه لو تخرجتي .. خيلتني! »

يمه فدوه!

## «يجنن»

أم حسام كلشي عدها «يجنن»..

ترُمت<sup>(1)</sup> عليه ما أصعد لـ (مخدعنا) بالطابق الثاني، الا لمن هي  
تگلي إصعد. ظليت أبواع برنامج طالع على الناشيونال جيوغرافيك  
يحچي عن صيد اسماك ضخمه، يمكن تونه مدري سلمون، وشلون  
يوزنوها وبييعوها، بعد أن يقدرها المشتري بحسب كمية الشحوم اللي  
بيها، بعدها درته على قناة بيها واحد يصلي بالناس جماعه ويبچي، مدري  
من خشية الله، مدري من گد ما مسوي ذنوب!

- نوحتي.. نوحتي!
- عيون نوحتي.. گلب نوحتي.. نفس نوحتي اللي يصعد وينزل..
- تعال اصعد بنجك اليمنى..
- عوينة أبو هلي.. إجيتج!
- على كيفك نوحتي، صين نومانسي، لا تصين عشائني، عاملني  
باطناف اصابعك، مثل كرة الطائنه، لا تتعامل ويايه عبالك كنة  
قدم!

---

(1) اجبرتنی

- راح اتعامل ويأچ مثل كرة الريشة! قبول؟

- قبون، ننوحتي انت، نوح نوحى، كحن عيونى..

صعدت للغرفة لگيت السيده الفاضله المغناج، محولتها الى شموع معطره، وریش نعام، واضواء خافته، وصوت موسيقى راقصه خفيض جدا، وهى لابسة روب حرير طويل جدا لونه گلگلى، ومربوط من خصرها، بشريط من نفس لون الروب، مقسم جسمها - العرض واحد - الى نصفين، واحد أحلى من الآخر، وريحة البخور مالیه المكان، وفجأة! علا صوت الموسيقى، بايقاع یرگص الثکلى، وبصوت مطربة مصریة شعبية، تغنى بصوت مبسوح:

أنا لا بحيلتي ولا بيدي

غير الغويشه دي اللي بيدي

ما قولتلك: خدها، وبعها

بس دلغني

وعلى ورق الفل دلغني

وچان تفتح أم حسام الروب وتطلع لابسه بدلة رقص شرقیه كامله لونها گلگلى، وچان يشتغل الهز اللي على أصوله، ويدها عكازه سوده مطعمه بفضه، تلعب بها كما لعبت بقلبي شمول، وتتقرب مني وتفترب بسرعه، فتضرب خصلات شعرها بخشمي الكريم، وتبعد لنهاية الغرفه وتجيني بسرعه وتلعب بخصرها يم خشمي، وتغني وي المطربه:

أنا لا بحيلتي ولا بودني

غير الحلق اللي بودني

ما قولتلك: يلا نبعو

وأسهر وياك ودليني

وعلى ورق الفل دليني

طبعا انا مالي گلب يتحمل، والموسيقى ترگص الحايط، گمت لبست  
كل ساعاتي باليمنه واليسره وگابلتها، وگمت ارگص مثل شعبان عبد  
الرحيم، وأضرب برسغ ايدي على گصتي مثله، وحرگنه الجو حرگ!  
طبعا هاي أو نمره بال (بنوگنام) وبعد تسعه يمكن!؟

## وعكة صحية

مو حلو المرض، ومزعجه أمراض البرد والصداع وحمى العظام  
القاتله. بس من تكون عندك زوجة مثل أم حسام يختلف الوضع!  
مساج لظهرك ورجبتك - يا بنادم - بزيت الكالبيتوس مع موال وأغنية:  
ياخشوف ال تَمُر بالبصرة!  
ريوگك عباره عن فروجه مسلوگه مع نومي بصرة وبصل العظیم، مع  
موال وإغنية:

داده حسن!

الجاي بالمرمية، يتبعه بعد ١٧ دقيقة، زنجبيل بالقرفه ساخن، يتخلله  
تدليك للرقبة وموال وأغنية:  
أنا من آگولن آه وأتذكر أيامي!  
تلفلف بفروه بدويه بنية اللون، مع جواريب قطنيه بلون كريمي، مع  
طخطيطات مستمره بحجة المريض يحب دفو!

## المربع الأول

أول مرة نتعارك أنا وأم حسام: وعركه چبيره، خلتنه في مفترق طرق،  
واحتمال نرجع للمربع الاول، ويبقى عدنه بس: بصيص ضوء في نهاية  
النفق!

والسبب هو أليسا، أو في الحقيقة أغنية أليسا اللي كانت داگتها من  
الصبح بالمطبخ وتغني وياها، مع بعض الاهتزازات العضلية الخفيفة.

دخلت للمطبخ بطريقتي العشائريه وقلت: شيني هاي؟!  
فأمتعضت، وتقرزت، وكشولت، وأجابت: شنو؟ أنيسا مسامع أنيسا؟  
قلت: وإن من شوكت تسمعين أليسا، من أخذتج كنت تسمعين  
ربيعه؟

فقلت بعصبية: هاي قبل! هسه آني أسمع سيلين ديون ووتني  
هيوستن!

بس صوچي عودردت أعدل ذائقتك الموسيقية، بس الظاهر راح تظل  
طول عمرك (البكره) مالت سعدي الحلبي بجيب دشداشتك!  
أنا أبو نايف!

هاي يمكن إهانه لذائقتي؟!!

## ما أريدك

اليوم أم حسام زعلانة!

أول مره تزعل هيچ أم حسام، وتعوف البيت وتروح لأهلها، قبل كم يوم صار بينه نقاش، يبدو انني تماديت فيه بلومها، على تدخل الآخرين في حياتنا.

حين عدت للبيت وجدت على طاولة المطبخ ورقة بيضاء كتب عليها بقلم الكحل كلمه واحده: «ما أريدك»!  
إيبيه أم حسام لا تريدني!

أي نهار بائس هذا، كيف تماديت الى الدرجة التي جعلتها فيه تكتب هذه العبارة!

ليست هذه المرة الاولى التي أغضبها فيها، لكنها المرة الاولى التي تترك فيها البيت..

لاول مرة أحس أن البيت ضيق لهذا الحد.

«وحيدا أصنع القهوة»

وحيدا أشرب القهوة»



بحثت عن سيگاره، عل دخانها يهدأ نفسي التي تاهت في (غياهب  
الفراق) ، فوجدت واحدة فوق الثلاجة، يمكن من أيام صدام، يابسة  
كحظي، فأشعلتها لتشعل هي رثائي!

صعدت لغرفتنا، وفتحت لأول مرة في حياتي دولاب ملابسها..  
يا.. لرائحة اللانكوم الفاخرة، يا لل « ميد نايت » الساحر، كل شيء  
في مكانه، البيجامات الستن والتنورات الطويلة، وبناطيل الجينز،  
والدانتيالات آه من الدانتيالات، كأنها تركتها مبعثرة هكذا، لتعذبني..  
آه..

هذا جزاء من لا يعرف قيمة الأميرات الحقيقيات..  
سأبيت الليلة بـ « العباس » وسأقرأ الصحيفة السجادية كاملة،  
ومفتاتيح الجنان لصاحبه عباس القمي..

## الحياة بلا أم حسام

بلا أم حسام لا طعم للدنيا، لا طعم للجمعه، لا طعم للكسل الصباحي اللذيذ، البارحة سافرت أم حسام لأهلها، وتركت البيت باردا حزينا. لأول مرة أحس أن لأم حسام أهل غيري، لأول مرة أشعر أن هناك من يشاركني بها.

خرجت من الصبح حتى أجيب الصمون الحار المغسب أبو السمس اللي تحبه، توقعت أرجع ألكاها بالمطبخ، توقعت عافت أهلها والدنيا كلها ورجعت، توقعت البارحة مثلي ما نامت الليل، ومن طبيت وما لگيتها، حسيت روعي يتيم، رجع للبيت ما لكه أمه.

تذكرت قصيدة قديمة لمحمود درويش، ما ظنيت يوم من الأيام تنطبق عليه، بس مع كل الأسف إنطبقت:

وحين أعود للبيت

وحيدا فارغا، إلا من الوحدة

يداي بغير أمتعة، وقلبي دونما وردة

فقد وزعت ورداتي

على البؤساء منذ الصبح.. ورداتي  
وصارعت الذئاب، وعدت للبيت  
بلا رنات ضحكة حلوة البيت  
بغير حفيف قبلتها  
بغير رفيف لمستها  
بغير سؤالها عني، وعن أخبار مأساتي  
وحيدا أصنع القهوة  
وحيدا أشرب القهوة  
فأخسر من حياتي.. من كفاحي  
أخسر النشوة  
رفاقي ها هنا المصباح والأشعار، والوحدة  
وبعض سجائر.. وجرائد كالليل مسودة  
وحين أعود للبيت  
أحس بوحشة البيت  
وأخسر من حياتي كل ورداتي  
وسر النبع.. نبع الضوء في أعماق مأساتي  
وأختزن العذاب لأنني وحدي  
بدون حنان كفيك  
بدون ربيع عينيك!  
أبكي!

## دلعني

أم حسام مو من عاداتها تدخل للفيسبوك، تگول:

ما أحبه، العراقيين كلهم كآبه، ويسوون عندي تجاعيد بوجي!

وعليه اليوم گالتلي:

بعد ممنوع تكتب، أو تحجي بالسياسة، ما أحبها..

أنه ما أگدر أخالف رغبات أم حسام، وتدرن رغبات الأمر أوامر!

وإحنا وادم عسکر!

گالتلي:

«تنوح للسوگ وتشتنني هذا العتر، أريده، أحبه، أموت عليه، واذا

ملگيته ملگيته كولش كولش، لا تجي الليله، روح بات يم فصوعي

فصصفع، يلا، باي»

شغلت السياره وطلعت للكراده گبل، ولو بغداد بعيدة، وازدحام، بس

شسوي:

«اللي يريد الغوى يصبر على أحوه».

أبو المحل شاب زغبروني وراقي، گلي: عمو هذا العطر عدنه بس

غالي شويه!

(عمو بعينك):

- بيش يعني؟

- بخمسين دولار

- إنطيني نص درزن

- ما عندي بس تلت قطع

- جيپهن بسرعه، غلفلياهن وحطهن بعلاگه راقيه.

حطيت بالسياره دي، وطلعت، هم يالله اوصل لكربلا المغرب.

مریت لكباب (محمد) أخذتلي تلت نفرات كباب، ومن (الشكرچي)

كيلوين حلويات مشكل، وطلعت جبل للبيت، لاگاني بالباب فصوع،

سألني: شجايبلي؟

نگرته بألف، راح طلقه لداكان أبو شیرين، طبگت السيارة وطبيت

لبيت (حبي)، لگيت ريحة البخور واصله لسربيل زهاب، و(حسن) مال

وحده تغني:

« على ورق الورد دلعني..

أنا لا بيدي ولا بيدي..

غير الغويشه دي اللي بيدي..

ما قتللك خدها وبعها..

بس دلعني »

إجاچ ملك الدلع.. كظي روحج!

## حالة متفاقمة

اليوم إكتشفت شغله غريبه بأم حسام!

في الصباح الباكر، حين دقت ساعة المنبه، وبدأنا متناغمين ” وكل على طريقته الخاصة ” بمرحلة التمتع والتدغمث كي نزيل بقايا تعب الليلة الماضية، حسيت أن السيدة اللذيذة التي تشاركني روعي تخن أكثر في الفترة الصباحية منها في فترة الظهر، وخاصة مؤخرا، بحيث لم أفهم جملتها الصباحية:

- صبا حين هببي بنكي عصرني نهري كونش أوجاني فدوه!

يمكن أخذها لابو أنف وأذن وحنجره اليوم..

الحالة تتفاقم!

## عسبي

اليوم أم حسام طالعتلي بشغله جديدة، تگول:

- انت ساير كولش كآبه، وعسبي، ومدري شونك!

من يوم شلت المرارة ولليوم وانت مكروه، شوفلك حل لنفسك،  
وغير البريستيج مالتك، ترى آني - والكلام دوما لأم حسام - ما أريد  
يتخربط شعري وتسير عندي تجاعيد من ورا عسييتك..

طبعا أنا، تدرن بيه مو عسبي، وأصلا فاهي، وأبرد من السقا نفسه!  
بس هاي أم حسام يمكنها مزاجيه وهوائية، وملت مني!  
مدري أنه غثه، وبريستيجي موشي، وما عدت أعرف كيف تعامل  
النساء الجميلات؟

هو اذا أنا أصدقائي وينه ووينه، منين يصير بريستييجي زين، ردتلي  
صديق بغدادي راقى، ماكو!

مگابل: محمد غازي أبو الراگ الراگ

وعلي ابراهيم صافي ابو الوافگت

ومحمد ثامر أبو البطنج والحيايا

شنو أتعلم منهم ذوله، جوگة معدان، وبروليتاريا رثه وكادحين، لا

عدهم بريستييج ولا أتيكيت ولا رقي!

لازم أشوف چاره لروحي، لا أگعد الصبح ألگيها: خالعتني!  
وعلي: أموتن!



## خوختي

الخوخ فاكهه لطيفه، وهو على أنواع، وأحجام، ولفرط حلاوة طعمه، وونعومة قشرته - أو جلده لو شئت - سميت الفتاة الجميلة المغناج: خوخه.

جلد الخوخ، أو البج سكين، ناعم كالحرير، أو كالكودري لمن لم يلمس الحرير طيلة حياته.

في زمن الحصار الجائر، إنتشر قماش للقمصان، لبسه الشباب والشابات معا، وهو عباره عن حرير صناعي مقدف، كان يسمى: بجسكي! الخوخ الرايج، الراوي، البالغ، المخمخ: تحبه زوجة روجي: أم حسام.

تحبه طريا جدا، ذلك أنها لا تأكله مثلنا، إنما تثقب ثمرة الخوخ، وتمتص رحيقها، ثم تلقيها جانبا، كما قلبي، لتبلش بأخرى.

الحياة مع أم حسام في الحقيقة مريحة جدا، فهي سيدة حنون، وغير متطلبة. مشكلتنا الوحيدة أن زواجنا كان سرياً في بدايته، مما جعل من حياتي - وقتئذ - مثل الفعاليات الثقافية إبان الحرب الأهلية في بغداد، حين تبدلت الامسيات إلى إصباحات.

أحيانا تسدل الستائر وتشعل الشموع، وتحرق بخور الصندل الفاخر لتشعرنني بأننا في منتصف الليل.

عظيمة هي أم حسام، سيدة تتحكم بحياتها بشكل مذهل، وهي  
الوحيدة القادرة على أن تشعرني بأنني أمير من أمراء الأندلس.  
حين تكتب لي كلمة: «أريدك»، أشعر أنني منوم مغناطيسيا، أختلق  
لي عذرا لا يقبل الرد، وأخرج مسرعا، ملهوبا، مرولا، مسعبلا، كأنني  
مكبسلا أو (واكل فول)!

## عودة أم حسام

أم حسام رقيقة، ومن فرط رقتها ما خلطني آبات ليله أخرى بدون دفء وجودها.

إجت محمله من أهلها: زيت زيتون وزعتر وحلويات وجبن ظفاير  
ولبن منشف وكعك وبقصم ودهن حر وباسطرمة، وبخور وعلج مر،  
وفواكه، وتين مجفف، أوووور.. أشكال وأرناك!

صدگ اللي يناسب ناس أهل خير وأصول يشبع (مي لحم) !  
كل هذا بكوم، ومن گالت:

- من البارحه منايمة لك داد، من يتغير فراشي فلا عيني تاخذ نوم!  
يمه فدوه للداد...

الليلة نسوي بيتزا وعلي!

## سبعة بالشهر

أكو هوايه ناس من تصخن، تگوم تحچي ۷ بالشهر، بس أم حسام من  
تصخن، تطلع الدفاتر العتيگه بس، وتتحول إلى منكر ونكير بس، وتظل  
تحاسب:

نیش بألفين وثمانیه من چنت رایح (دونه) حاچي وي هاي المكروهه  
أم قمصان الشيفون؟ نیش ما تذكرت عيد مينادي العام؟ نیش ما إنطيتني  
نأيك بنون شعني الستنوبري؟  
- ما أنيدك، ما أحبك، نوح!  
أذوبن..

لم أكن أتصور يوماً أن ما بدأ كنوع من الكتابة الترفيهية  
 التهكمية "التحشيشية"، في صفحتي على موقع فيسبوك سيلاقي  
 كل هذا الاهتمام من الأصدقاء والمتابعين، ويتحول الى مجموعة  
 مفتوحة يتزايد عدد زائريها يوماً بعد يوم، بفعل سلسلة مغامراتي  
 الافتراضية، مع بطلتها السيدة المحترمة الجميلة المغناج: أم  
 حسام، وما هي اليوم تتحول إلى كتاب أمل أن يكون بمثابة  
 حبات سكر تحلي لحظاتكم بعيدا عن مرارة العنف التي تعكر  
 صفو حياتنا.



الكتاب هذا يجمع ويوثق سلسلة مدونات لمغامراتي مع  
 زوجتي الثانية الافتراضية بالطبع والتي سبق أن نشرتها، على  
 مدار أكثر من عامين، على موقع التواصل الاجتماعي، فيسبوك  
 والتي تدور في فلك البحث عن إجابة لتساؤل لطلما أرقني، كما  
 أرق معظم المهتمين بالشؤون الكاشانية: لماذا لا تشيخ بعض  
 النساء؟ ولماذا تتوقف عقارب الزمن لديهن عند حاجز الأربعين  
 عاما وشهر واحد فقط لا غير؟! وكيف لبعضهن هذه القدرة على  
 الاستحواذ على فؤاد الرجل وكسر رتابة الايام؟

صالح الحمداني

مكتبة سومر



DAR ALHIKMA  
 Publishing and Distribution

88 Chalton Street, London NW1 1HJ Tel: 44 (0) 20 7383 4037 Fax: 44 (0) 20 7383 0116  
 E-Mail: hikma\_uk@yahoo.co.uk Website: www.hikma.co.uk

